

San Mateo

Jesube bēts taitanga

(Lc 3.23-38)

¹ Quemēnga imnamna Jesucristbe bēts taitanga: Jesucristna Rey David y Abrahámbentsana entšá inamna.

²⁻⁶ Abraham yojamna Isaacbe taitá; Isaacna Jacobēbe taitá y Jacob, Judá y chabe catšátangbe taitá. Judá, Fares y Zarabe taitá; y chatbe mamá Tamar yojamna;

Fares Esrombe taitá y mua Arambe taitá.

Aram Aminadabēbe taitá; Aminadab Naasonbe taitá y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna; y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá y Abíasna Asabe taitá;

Asa Josafatbe taitá;

Josafat Jorambe taitá y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.
 Ezequías Manasesbe taitá;
 Manasés Amonbe taitá
 y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y choca imojanëtámena ora, Josías chë básenga yojánabamna.

12-16 Ya Babilonioca ndutámenënga ora;

Jeconías Salatielbe taitá;
 Salatiel Zorobabelbe taitá.
 Zorobabel Abiudbe taitá;
 Abiud Eliaquimbe taitá
 y Eliaquimna Azorbe taitá.
 Azor Sadoche taitá;
 Sadoe Aquimbe taitá
 y Aquimna Eliudbe taitá.
 Eliud Eleazarbe taitá;
 Eleazar Matanbe taitá
 y Matán Jacobëbe taitá.

Jacob Josebe taitá yojamna y Josena Mariybe boyá.
 María Jesusbe mamá, Jesús chë Bëngbe Bëtsabe
 Uámana Uabuayaná, chë Cristo ca uabainá.

17 Chcasna, Abrahámbentsana Davidbentscoñe bnëtsana canta bëts pamíllanga imojëftsemna. Davídbentsana y chë israelitënga Babilonioca imojanëtamenëntscuana inye bnëtsana canta bëts pamíllanga; y inye bnëtsana canta bëts pamíllanga chë Israeloca entsanga imojanëtamenentsana, chë Cristo tojanonýnántscoñe.

*Jesucristo tojanonýná
 (Lc 2.1-7)*

18 Jesucristo jónŷnanamna mēntšá tojanopasá: María tbojanšbuachená Joséftaca jobouamayama, pero cabá ndoñe cánŷiñe ibontsiyena ora, tojanopasá Mariyna ngomamaná yojoquéda chē Uámana Espíritbe obenánaca. 19 José, Mariybe boyá, canŷe nŷetsca soyēnguiñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nŷe iytēcana Mariybentšana jtsojuánañana. 20 Y chca yojtsejuabnantscuana, mo otjenayoquécá canŷe Bēngbe Bētsabe ángel tbojáninŷe y chana Josébioye tbojaniyana: “José, Davídbentšana entšá, ndoñe matenócochinŷenana Maríaftaca jobouamayama, er chē bochántsebomna šešona chē Uámana Espíritbe obenánaca cha bochántsebomna. 21 María canŷe šešona bochántsebomna y cha Jesús ca cochjuabaye. Chca echantsabaina er cha chabe entsanga chēngbe bacna soyēnguentsana echanjátsebacaye ca” —chē ángel tbojaniyana.

22 Lempe chca tojanochnēngo, cachcá chaotsemnana ntšamo Bēngbe Bētsá chabe juabna oyebuambnayēngbiajana tojanayancá. Chē oye-buambnayá mēntšá tojánayana:

23 Chē cabá boyabása nduabuatmá ngomamaná echanjoquéda

y canŷe šešona boyabásetema bochántsebomna,
y cha mochanjuabaye Emanuel ca.

(Emanuel endayana “Bēngbe Bētsá bēngaftaca ca”.)

24 José chē otjénayentsana tojanofšená ora, tojanma ntšamo chē Bēngbe Bētsabe ángel

tbojanmandacá y Mariáftaca tojanobouamá.
 25 Pero ndoñe cányiñe ibontsaniyena, sinó
 nñe chë šešonatema tojanonýná orscana. Chë
 šešonatema tojanonýná orna, José chábioye Jesús
 ca tbojanabaye.

2

Reyes Magos Jesúsbioye tmojána

1 Herodes judiëngbe rey yojamna ora, canñe
 pueblo Judeoca, Belén ca uabáinentše Jesús
 tojanonýná. Chentsana, báseftanga, estrellënga
 uatsjëndayënga, magos ca uabáinënga, canñe bëts
 pueblöye Jerusalén ca uabáinoye tmojánashjajna.
 Chënga tmojánabo shinñe bocanoye luarëngocana.

2 Jerusalenocna chënga, Heródesbioye tmojána
 y tmojanënoticiá: “¿Ndayentše yojtsemna chë
 judiëngbe rey jtsemnama tojonýná cha ca? Bëngbe
 luarëngoca shinñe bocanoye chabe onýnana
 estrella fsënjinye y as muentše cha jaboadórama
 tifjabo ca.”

3 Rey Herodes chca tojanuena ora,
 corente yojtsenócochinýena, y nñetsca chë
 Jerusalenentše oyenëngnaca. 4 Chentsana

chë rey tojánachembo nñetsca chë judiëngbe
 bachnangbe amëndayënga y chë judiëngbe ley
 abuátambayënga jenoyeunayëngama. Mëntsá
 tojanatjá: —¿Ndayentše chë Bëngbe Bëtsabe Uámana
 Uabuayaná, chë Cristo ca uabainá, jónýnama
 ibomna ca?

5 Chënga tmojanjuá: —Judeoca, Belén
 pueblentše ca. Bayté entsemna chë Bëngbe

Bëtsabe juabna oyebuambnayá Miqueas mëntšá tojanábema:

⁶ Y tšëngaftanga, Judeoca Belenentše oyenënga, canyë mandayá tšëngaftangbentsana echanjabo. Cha nÿetsca chë Judeoca mándayëngbiana más uamaná echántsemna, y atšbe entsanga Israeloca echántsanÿena.

Chíyeca tšëngaftangbe pueblo ndoñe nÿe batsá uámana pueblo quenátsmëna ca.

⁷ Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninÿama. ⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanëyana: “Choye motsajna y tšabá chë šešona šmochjánguango. Chašmojinÿena ora, šmochjabëuenaye, as átšnaca chayobená jama chë šešona jadórama ca.”

⁹ Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinÿe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójayiye. ¹⁰ Chë maguënga chë estrella tmojáninÿe orna, corente oyejuayënga imojtsemna. ¹¹ Chë yebnoye tmojánamashjna ora, chë šešona tmojáninÿe chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontëmënga tmojanëtsécaca y tmojanatštá castellano, incienso y canyë botamana uanguëtše soye, mirra ca uabáiniye. ¹² Chentšana, mo canyë otjenayoquëcá Bëngbe Bëtsá chë maguënga tojanabuayená rey

Herodesbiajana ndoñe chamondesshëcuana. As chënga chentšana inye benachëjana cachëngbe luarëngoye tmojésanshëcuana.

Egiptó luaroye tmojtsanachá

¹³ Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninye y cha mëntsá tbojaniana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

¹⁴ As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntsá tojánayana: “Egiptocana atšbe uaquiñá sënjanchembo ca.”

Herodes tojanmandá basetëmënga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerta tbojánetna, y tojanmandá lempe jtsëbáyama base boyabásetëmënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninyama. ¹⁷ Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

18 Ramá ca uabaina pueblentše canye oyebuambnayanana tmojanuena,
ngménaca ošachiyana y beca tsetšanánaca oyebuambnayanana.

Raquel yojamna chabe básengbiana ošachiyiñe,
pero ndoñe yontseboše chamuatebiajuama,
chabe básenga ya obanenga causa ca —cha tojanábema.

19 José cabá Egiptoca yojtsomñe ora, Herodes tojanóbana. Chentšana, otjénayoca José canye Bēngbe Bētsabe ángelbioye tbojáninye y cha mēntšá tbojaniana: 20 “Motsbaná, chē šešonatema y chabe mamá mesēbiatše y Israeloye cochtá. Chē šešonatema jóbama bošēnga ya obanenga montsemna ca.”

21 As José tojantsbaná y chē šešonatema y chabe mamá Israel luaroye tojtésanēbiatše. 22 Arquelao Judeoca yojanmánda chabe taitá Heródesbe cuentiñe, y José chca tojántatsēmbona orna, yojtsauatja choye jama. Pero otjénayoca Bēngbe Bētsá Josébioye tbojanbuayená; chíyeca Josena Galilea ca uabaina luaroye tojána. 23 Choye tojánashjango ora, José tojána canye pueblo Nazaret ca uabáinoye chentše joyéanama. Chca tojanochnēngo cachcá chaotsemnama ntšamo chē Bēngbe Bētsabe juabna oyebuambnayanēnga tmojanayancá. Chēnga tmojánayana: “Nazaretocá ca Jesús mochantsábobaina ca.”

3

*Juan chē Ubayaná entšanga yojanabuayiyná
(Mc 1.1-8; Lc 3.1-9, 15-17; Jn 1.19-28)*

¹ Chë tempo, Juan chë Ubayaná, entšanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mëntsá cha yojanëtsëtsnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canya ndabiama chë Bëngbe Bëtsabe juabna oyebuambnayá Isaías mëntsá tojánayana:

Entšanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entšá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

⁴ Juanbe entšayá inauapormana camellbe stjënasheca y bobache yojanasnana. Cha inasaye chapulinatémënga y tjoca tjouangbe méloye.

⁵ Jerusalenoca entšanga, nyetsca Judea luarentša entšanga y chë Jordán ca uabaina béjaye béconana oyenënga imojánbocana Juan joyeunayama.

⁶ Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

⁷ Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtšcuaye entšanga! ¿Nda

tcmenjáyana chë echanjóshjango uabouana castigüentsana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama. ⁹ Y ndoñe šmattsejuabnaye cach tšëngaftangbiamajayanama: ‘Abrahámbentsana entsanga fsëndmëna ca’. Er atše šcuayana, Bëngbe Bëtsá quem ndëtsbéngacnaca Abrahámbentsana entsangananjábiamama. ¹⁰ Chë tatsnía ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamamá obenana bomná comna, y atše merecido taitatobuajoñe ni mo chabe shecochëtjonëshe jtsámbañama. Chë chabe benache aíñe chamojtishachëngbiamama Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequëcá. ¹² Canýe entsá chabe mëtštá cucuatšinë jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñoye jtsatmetšana.

Cachcá, chë atšbe ústonoye echanjabana, chë tšabe entšanga echanjúbuaja, y chë bacna entšangna canýe iñeshiñe echantsacastígaye, y chë iñe ndocna te queochátsfsana ca” —cha tojanéyana.

Juan, Jesúsbiöye tbojanabaye

(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuabayama. ¹⁴ Pero Juan ndoñe yontseboše Jesús juabáyama, y mëntšá tbojaniyana: —Atše šontsemna aca chašcuabaye, y ¿más atše aca chochjuabaye ca?

¹⁵ Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojtješiye y tojáninýe chë celoca atëfñiñe y chë Uámána Espíritu mo canýe palomatemcá chábioye yojtsastjajuana. ¹⁷ Chora celocana Bëngbe Bëtsá mëntšá tojánayana: “Mua atšbe bonshana uaquiñá endmëna. Chabiyama corente sëntsoyejuá ca.”

4

Jesús tojanobená Satanás jayëñjanama

(Mc 1.12-13; Lc 4.1-13)

¹ Chentšana chë Uámána Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

² Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. ³ As Satanás tbojanobobeconá y

tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

⁴ Pero Jesús tbojanjuá: —Bëngbe Bëtsabe uabemana palabrënguiñe mëntsá endayana: “Entsá nÿe tandëseca ndoñe vida ntsebomnana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

⁵ Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentse chë más tsbanánoca tbojanatsá. ⁶ Chentše Satanás mëntsá tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana:

Bëngbe Bëtsá chabe angelënga echanjichamuá, chacmotsinÿenama.

Chënga buacuatšëngaca cmochanjishache, shecutse ndëtsbeñe ndocá chacondomama ca — cha tbojaniyana.

⁷ Chora Jesús tbojanjuá: —Cach Bëngbe Bëtsabe uabemana palabrënguiñe mëntsá endayana: “Ndoñe mašbošana acbe Bëtsá chë Utabná bacna soyëngama jacocheñguama ca.”

⁸ Cabana, Satanás tbojanánatse canÿe bëts tjoye y betesco nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿe. ⁹ As Satanás tbojaniyana: —Aca chacojoshëntsamentsé y chašcojadorase, lempe chë soyënga cbochjatštaye ca.

¹⁰ Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrënguiñe

mëntšá endayana: “Bëngbe Bëtsá cochtsadorana y nÿe cha cochtseservena ca.”

¹¹ As Satanás cachcá tbojanonÿá. Cachora Bëngbe Bëtsábiocana angelotémënga tmojánabo Jesús jtseeservénama.

Jesús tojanontsé Galileoca chabe trabajo jamana

(Mc 1.14-15; Lc 4.14-15)

¹² Juan chë Ubayaná cárceloye tmojanëtámiamama Jesús tojanuena ora, Galilea luaroye cha tojtaná.

¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chë uámana bëts taitata Zabulón y Neftalibe luariñe. ¹⁴ Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnaya Isaiás tojanayancá. Isaiás tojánayana:

¹⁵ Zabulón y Neftalibe luare, Jordán béjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

¹⁶ Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnaya.

Chë chëngbe juabnënga binÿnaya entsebuashinÿinÿana chë Bëngbe Bëtsábioye nduabuatmëngbiama,

y chë causa chabiamama imomna mo obanëngcá, ndoñe binÿniñe jtseyenëse ca —cha tojanábema.

¹⁷ Cach orscana Jesús tojanontsé entšanga jábuayenama: “Bëngbe Bëtsabe amëndayana ya

echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuastama

(Mc 1.16-20; Lc 5.1-11)

¹⁸ Canye te, Jesús chë Galilea uafjajónaye tsachajana yojtsaye y ndeolpe uta boyabásata tojanýe: canya yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuétsetšaňe, er beonga ashebuánayata ibnamna. ¹⁹ Jesús tojanéyana: “Atšeftaca mabata; atše chochanjábiama Bëngbe Bëtsabiama entšanga anguayata, y morscana nýe beonga ashebuánayata ya ndoňe quešochátsmëna ca.” ²⁰ Cachora chatbe atarraiëshangá cachcá tbojésanaboshjuana y Jesús tmojanasto.

²¹ Y más chcoye, Jesús inýe uta catšátata tojánanýe: Santiago y Juan, chë Zebedeobe uaquiñata. Chata ibojtsomňe canye barquëshañe, chatbe taitáftaca, chëngbe atarraiëshangá atapórmayiňe. Jesús tojánachembo, ²² y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

Jesús ba entšanga yojanabuatambá y yojánashnaye

(Lc 6.17-19)

²³ Jesús nýets Galilea luarëjana yojánana, chentše judiëngbe enefjuana yebnënguenache abuatambaye. Chë tšabe noticiënga Bëngbe Bëtsabe amëndayama entšanga yojanabuayiyná y nýetsca šocanëngama y tsetšanëngama yojánashnaye. ²⁴ Nýets Siria

luarëjana entšanga cha imojtsebáyana. As entšanga nyetsca šocana bomnënga Jesúsbioye imojtsénachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

²⁵ Mallajta entšanga Galileocana, Decápolis luarocana, Jerusalenocana, Judeocana y chë Jordán béjaye chengvanoicana Jesús imojústona.

5

Ndayá Jesús tjoca tojanabuatambá

¹ Jesús chë mallajta entšanga tojánanyë ora, bat-sjoye tojánstjua y tojanótbema. Chabe ústonënga tmojanobobeconá y ² Jesús tojanontsé mëntšá jabuátambana:

Ndëmuanyënga imomna chë ndegombre oyejuayana bomnënga
(Lc 6.20-23)

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entšanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

6 “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinyana lempe ntšamo tmojtsebošcá.

7 “Puerte oyejuayënga mochántsemna chë ínÿengbiama ongmiayënga, er Bëngbe Bëtsá chëngbiama bochanjóngmia.

8 “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

9 “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

10 “Puerte oyejuayënga mochántsemna chë ínÿenga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyáanguango y chacmojtsécamena ora y nyetscna soyëngaca chacmojtsëbuayatsenaye ora, atšbe ústonënga bétsemnama. 12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmécamena, cachcá chë Bëngbe Bëtsabe juabna oyebuamb-nayëngbioye, chë tšëngaftangbe natsana monjaniyenëngbioye entšanga monjanëcamena ca” —Jesús tojánayana.

*Ošbuáchiyënga jtsemnana mo tamocá y
binÿnayënga quem luarentša entsangbiana
(Mc 9.50; Lc 14.34-35)*

13 “Tšëngaftanga, quem luarentša entsanga jtsëjabuáchanëse šmojtšiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondónbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtšmënana. Chca, ya tondayama ntsoservénana; chíyeca chë tamó tsáshenoye jtsëtšenana y entsanga jtsebotájayana.

14 “Tšëngaftanga, ntšamo tšabá yomncá šmojtšiyenëse, as quem luarentša entsangbiana šmochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntsopodénana iytëmencá jtsemnana. 15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nÿetsca entsanga chë yebnentše tmojtsemnëngbiana chaotsebínÿnama. 16 Cachcá tšëngaftanga, entsangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnana ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyinÿe iuayancá y chë Bëngbe Bëtsabe juabna oyebuambnayënga tmojanayancá jabétsepochochocama atše tijabo ca. Atše ndoñe

chiyátabo chë soyënga jabétsepochochocama, sinó jabábuayenama ndayá chë soyënga ndegombre bétsayanama. ¹⁸ Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe punto, ni canÿe letra chë leyënguentsana jtsejuánana, lempe ntšamo jochnënguama yomncá chaojtsemnëntscuana. ¹⁹ Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. ²⁰ Chë soyëngamna mëntsá šcuayana: Tsëngaftanga chë ley abuátambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

²¹ “Tsëngaftanga šmojouena ntšamo Bëngbe Bëtsá tsëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca.’ ²² Pero atše šcuayana, nda cachabe catsátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante,

ndáyeca chca ca. Nda cachabe catšátbioye **puerte** tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiama opjema ca tojayana, ntšamo cha bétsamama, cha bontsemna chë infiernoca íñeshoye jama.

²³ “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, ²⁴ as chë tcojiyëbo soye chë altar-entša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšinë cmochanjáboshjona y chënga cárceloye cmochanjutame. ²⁶ Ndegombre cbëyana: Chentšana ndoñe quecochtétsbocna lempe candesopagantscuana ca” —Jesús tojánayana.

Chë boyá o shémbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’ ²⁸ Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca

ya chë inÿe shembásaftaca cachabe shémbioye tbojtseingñé.

²⁹ “Chíyeca, nderado acbe catsbioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtšena. Nÿets cuerpo jtsebomnana y lémpeca infiernoye jama chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé. ³⁰ Nderado acbe catsbioica cucuátšeca bacna soye tcojamëse, más tšabá nántsemna chë cucuatše cochtsenástjango y cochtsëtšena. Nÿets cuerpo jtsebomnana y lémpeca infiernoye chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

*Chë bouamnata enëtšanama Jesús tojanabu-
atambá*

(Mt 19.9; Mc 10.11-12; Lc 16.18)

³¹ “Mëntšánaca leyiñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiiyana, ndayéchañe chaotsayana cha ya ndoñe chabe shema yontsemna ca.’ ³² Pero atše cbëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entsanga júrayama Jesús tojanabuatambá

33 “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ ³⁴ Pero atše cbëyana: Tondayama šmattsejúrayer; ni celocama, er choca Bëngbe Bëtsabe tbemaniñe endmëna. ³⁵ Ni quem luarama, er Bëngbe Bëtsabiamama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. ³⁶ Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjënashe ftsenguëshe o fjantsëshe jabemana. ³⁷ Tšëngaftanga aiñe ca jayanama šmojtsebošëse, nñe aiñe ca šmochjayana, y ndoñe casna nñe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

Chë entsanga mondbátenachnënguama Jesús tojanabuatambá
(Lc 6.29-30)

38 “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canyëbé cha jëtsbuchjátsëcama ca; y nderado nda canye juatsaše tcmojtsásiye, ácnaca derecho contsebmna cányëše cha jtašiyama ca.’ ³⁹ Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebiantsetase, cochjomiye chë ínñoica cachcá chacmomama. ⁴⁰ Nderado nda tcmojademandá y tojtseboše acbe

shabuanguanējua jtsabocñama, cha molesenciá acbe quěfsaíyanaca chauetsácñama. ⁴¹ Nderado nda tcmojuasmá y tcmojamandá bnětsana cuadroca juyambama, inye bnětsana cuadroca cochjuyamba. ⁴² Nda ndaye soye tcmojotjañese, cochjatštaye; y nda ndaye soye tcmojuátjase, cha ndoñe stětsoye catjaquéda ca” —Jesús tojánayana.

Chë uayayëngbiana bonshánana jtsebomnana
(Lc 6.27-28, 32-36)

⁴³ “Tšëngaftanga šmojouena ntšamo tšëngaftangbe běts taitángbioye tmojaněyancá: ‘Acbe amigo cochtsebobonshana y acbe uayayá cochtsaboyënja ca.’ ⁴⁴ Pero atše cběyana: Tšëngaftangbe uayayënga šmochtsababuányeshana, y chë cměcamenëngbiana Bëngbe Bětsá šmochtseimpadana. ⁴⁵ Chca tšëngaftanga, chë Taitá, Bëngbe Bětsá, chë celoca endmënabe básenga šmochántsemna; Bëngbe Bětsá endbětsama tšabe y bacna entšángbeñe chabe shinye chaotsebinynayama, y endbětsama chë nyetsca soyënguiñe tšabá jamama bošënga y ndoñe chca entšángbeñe chauaftema. ⁴⁶ Tšëngaftanga nye chë tšëngaftanga tcmojtsababuányeshanënga šmojtsababuányeshanëse, ¿Bëngbe Bětsábiocana ndayá šmochjuacaná? Romocama crocénana entšángbioye atjanayëngnaca chca monduamana. ⁴⁷ Y nye chë amiguëngbioye šmojtsacheuanase, ¿ndaye běts soye šmojtsama? Chë ndoñe judiëngnaca chca mondbětsama. ⁴⁸ Tšëngaftangbe Taitá, Bëngbe Bětsá celoca endmëná, nyetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

6

Jesús tojanabuatambá ntšamo tšabe soyënga ínÿengbiamajamana

¹ “Cuedado šmochtsebmna ndoñe ntsamama entsángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endméná ndocna uacanana soye quecmochtétatšataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatšëmbuama, mo canÿe trompetéfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entsanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tšabá chëngbiamajamana tmojtsoyebuambná ora. ³ Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, ⁴ chca, acbe caridá iytëcana chaotsemnana. As, tšëngaftangbe Taitá, nda bominÿe endbétsequëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntšamo Bëngbe Bëtsáftaca jencuéntana
(Lc 11.2-4)

5 “Bëngbe Bëtsáftaca šmojtscuénta ora, ndoñe šmattsama chë bacna entšanga ntšamo ndegombre tmojuabnacá ndinyïnÿnayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entšanga tmojayana ora. ⁶ Pero aca Bëngbe Bëtsáftaca jencuéntama orna, acbe tsoye cochtamáshëngo, bëshása cochtatame y cháftaca cochjencuénta. Chánaca chë iytëmentšë ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

7 “Bëngbe Bëtsáftaca šmojtscuénta ora, ndoñe nÿe cachcá ndoservena palabrënga ba soye šmattsichamo. Chca mondbétsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. ⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. ⁹ Chamna tšëngaftanga mëntšá cmontsétocana Bëngbe Bëtsáftaca jencuéntana: Bëngbe Taitá, celoca icotsomñe. Acbe uabaina chë más uámana uabainana chauesomñe.

¹⁰ Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

¹¹ Mënté šmiyatsatá cada te šnetsëjaboto tandëše.

¹² Bacna soyënga bënga fsënjama:
šmotsaperdónaye;

cachcá ntšamo chë bëngbiana bacna soyënga
amënga fsëndbetsaperdonaycá.

¹³ Bacna soyënga jamama šojocochëngo ora,
šcochjujabuache chca ndenobuíyama.

Njëtsca bacna soyënguentsana šmatsebacaye.

¹⁴ “Chë tšëngaftangbiana bacna soyënga amënga
šmojtsaperdónasna, Bëngbe Taitá chë celoca
endëtsomñá, tšëngaftanga cmochanjáperdonaye.

¹⁵ Pero chë tšëngaftangbiana bacna soyënga amënga
ndoñe šmontsaperdónasna, Bëngbe Taitá cachcá,
tšëngaftanga ndoñe quecmochátaperdonaye ca”
—Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inye ora tondaye
ntjascá šmojtsemna Bëngbe Bëtsáftaca
jencuéntama, juebëngménënga ndoñe šmattsemna,
ntšamo chë bacna entšanga chë ndegombre
tmojuabnacá ndinÿinÿnayënga mondbetsamcá,
as chca, chënga imojtsayúnama entšanga
chamuinÿama. Ndegombre šcuayana, chëngbe
uacanana soye ya tmojóyëngacñe, chënga
tmojayunáyeca entšanga tšabá chëngbiana
tmojtsoyebuambná ora.

¹⁷ Aca nderado
tcojtsayúna ora, cochtsojuebjabebiyey y aceitíyeca
botamana cochtenochquëca, ¹⁸ as chca, entšanga
ndoñe chamondëtsetatšëmbo aca tondaye ntjascá
cojtsemnama. Nye acbe Taitá, lempe chë mo

iytēmencá yomna soyëngama tatsëmbuá, chama echántsetatsëmbo. Y cha, chë iytēmencá tcojama soye bominyë endbetsequëcjayá, acbe uacanana soye cmochántatštaye ca” —Jesús tojánayana.

Chë celoca bomnana
(Lc 12.33-34)

¹⁹ “Bomnana quem luarentşe ndoñe şmattsëjuabaye. Muentşna chë mejojón y inye pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. ²⁰ Más tşabá tşëngaftangbiana entsemna, mora quem luarentşe tşabe soyënga şmojtsamamna, uacanana soyënga celoca chaotsójuabaye. Chentşe ni chë mejojón, ni chë inye pochócaye soyënga acbe soyënga quemochatspochóca, ni atbëbanënga quemochátamashjna jatbëbama. ²¹ Er chë ndayentşe acbe bomnana tojtsemnentşa soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinyanëshsha
(Lc 11.34-36)

²²⁻²³ “Acbe bominyë tşabá totsomñëse, mo canye uajuinyanëshacá acbe cuerpama jtsemnana, chíyeca aca jtsobenana ntşamo tcojtsamcá chë bomínýeca jtsonyayana. Chë bominyë ndoñe tşabá tontsemnëşna, chë bominyë tondaye ntsoobenana jamana, ntşamo tcojtsamcá chacobená jinýama. Cachcá, acbe ainaniñe tşabe juabnënga tcojtsebomnëse, lempe ntşamo chacojtsamcá tşabá echántsemna. Y acbe ainaniñe ndocna tşabe juabnënga tcontsebomnëşna, lempe ntşamo

chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiana bonshánana o chë nyë quem luarentša soyënga jtsebošana

(Lc 16.13)

²⁴ “Ndocná ntso benana uta mandayata jtsaservénana: cánÿabioye bochantśáboyënja y chë ínÿabioyna bochantśebobonshana, o cánÿabiana tšabá echántsetrabajaye y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtsebonnama yapa tcojtsebošëse ca” —Jesús tojánayana.

Bëngbe Bëtsá chabe básenga jtsanÿenana

(Lc 12.22-31)

²⁵ “Chcasna atše šcuayana: Ndoñe šmattsenócochinÿena ndayá šmochjase o šmochjofsiye vida jtsebonnama, ni ndaye entśayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entśayama más. ²⁶ Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatśatnayana. ¡Y tšëngaftanga chë shloftšetémëngbiana puerte más šmonduámana! ²⁷ Masque chca endmëna, ¿ntśamo nanjobenaye jamana chë ntsachetśá vida yochtsebonmentsana, canÿe hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinýena? Smochjinýe chë jajañe lirio uantšefjushangá jtsajuajnana: ndoñe ntsetrabájayana, ni ntshabiamnayana. 29 Pero atše cbëyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjatspormana. 30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuanaca cha tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, jentšanga nyë batšá Bëngbe Bëtsábeñe ošbuáchiyënga! 31 Ndoñe šmattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo cá?’ 32 Chë soyëngama, chë Bëngbe Bëtsábioye nduabuátmënga mondbëtsenocochinýena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjaboutama endëtatsëmbo. 33 Chíyeca, tšëngaftangna natsana šmochjshétseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjaboutcá cmochanjátšataye. 34 Ndoñe matenócochinýenana ndayá yëfse yochjochnënguama. Yëfse luare cochántsebomna chë soyënga jinýama y jamama. Cada tescama endbëtsemna yapa totcá soyënga jájandmanama cá” —Jesús tojánayana.

Ndoñe ntsichámuana chë ínÿenga tšabá o ndoñe tšabá tmonjamama

(Lc 6.37-38, 41-42)

¹ “Ndocá ínÿengbiamama šmattsichamo chë ndoñe tšabá tmonsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. ² Chë ntšamo tšëngaftanga ínÿengbiamama šmojtsichamcá tšabá o ndoñe tšabá tmonsamama, cachcá Bëngbe Bëtsá tšëngaftangbiamama chë ntšamo šmojamama echántichamo. Y ntšamo ínÿengbioye chašmojábiama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiama.

³⁻⁵ “Nderado canÿa chabe bominyiñe canÿe niñëfja tojtsebomñese, cha ndoñe ntsoebenana chabe catšata jauyanama: ‘Acbe bominyëntšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominyëntšana chë niñëfja jtšenobuchjátsëcana tšabá jinÿama jobenayama, chabe catšatbe bominyëntša polvështema jtsebuchjátsëcama. Cachcá entsemna acbiamama, ¡bacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

6 “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Aíñese nántsemna mo chë Bëngbe Bëtsabe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtsancá, chënga nyë jtsebotájayana ca” —Jesús tojánayana.

Smochjotjañe, smochjáanguango y smochjachembo
(Lc 11.9-13; 6.31)

7 “Smochjotjañe y Bëngbe Bëtsá cmochanjátšataye; smochjáanguango y smochanjínÿena; smochjachembo y bëšáša cmochanjébëtafjo. 8 Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

9 “¿Ndëmuanÿe boyabása tšëngaftanguentsá, canÿe tandëše chabe uaquiñá tbojtsotjanañe ora, canÿe ndëtsbé chábioye buanjatštaye? 10 ¿O canÿe mëtšcuaye buanjatštaye, beona tbojtsotjanañe ora? 11 Y chca, tšëngaftanga, bacna soye amënga, tšëngaftangbe basetémënga tšabe soyënga jatšatayama šmojtsamanëse, jmás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

12 “Inÿëngaftaca šmochtsama ntšamo chë ínÿënga tšëngaftangaftaca chamotsamama šmojtsebošcá. Chca endmëna ntšamo Moisesbe leyíñe y chë Bëngbe Bëtsabe juabna oyebuambnayëngbe

buatëmbana soyënguiñe endayanca ca” —Jesús tojánayana.

Chë base utëntśá bësásá
(Lc 13.24)

¹³ “Chë base utëntśá bësásájana šmochjámashjna. Chë utëntśá bësásájana y chë paselo jóyename benache, infiernoye cmochanjuánatse y banga chëjana mondámashjuana. ¹⁴ Chë tšabe vida binÿnoye jamna base utëntśá bësásájana endmëna y ndoñe paselo jóyename benache, y chiñe báseftanga mondbínÿena.

*Chë Bëngbe Bëtsabe ndoñe ndegombre juabna oye-
buambnayënga*
(Lc 6.43-44)

¹⁵ “Cuedado šmochtsebomna chë Bëngbe Bëtsabe ndoñe ndegombre juabna oye-buambnayëngbiana. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. ¹⁶ Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátatabiana, ni higuëbé cardo betiyentsana. ¹⁷ Chca, nÿetsca tšabe betiyiñe tšabe soye jashájonana; y chë ndoñe tšabeshiñna podesca soye. ¹⁸ Canÿe tšabe betiyiñe quenátopodena podesca soyënga jashájonana, ni canÿe ndoñe tšabe betiyiñe tšabe soyënga jashájonana. ¹⁹ Ndaye betiye podesca shajuanëshe jtseshatëtšana y iñoye jtsatmetšana. ²⁰ As chca tšëngaftanga chënga

šmochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nyetscanga jamashjnana

(Lc 13.25-27)

²¹ “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe. ²² Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótsëmbonëse, ácheñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentšana fsëndëtabocana, y ácbeyeca bëts soyënga fsëndama ca.’ ²³ Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’ ” —Jesús tojánayana.

Chë uta ucuatjoniñe

(Mc 1.22; Lc 6.47-49)

²⁴ “Chcasna, nda atše šojoyeuná y chë ntšamo sëntsichamcá tojtsama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo. ²⁵ Uaftena yojuáshjango, chë béjayënga yojóftjajna, chë yebnoye puerta yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. ²⁶ Pero nda atšbe palabra tojouena y ntšamo sëntsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo. ²⁷ Uaftena yojuáshjango, chë

béjayënga yojóftjajna, chë yebnoye puerte yojtsebinÿiaye y chë yebna uabouancá yojtsáshajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entšanga ojnanánënga imojtsemna ntšamo cha tojánabuatambama.

²⁹ Jesús tojanabuatambá nÿets obenánaca, mo canÿa mando bomnacá y ndoñe nÿe mo chë ley abuatambayëngcá.

8

Jesús, canÿa bacna nguayanánaca šocábioye tbojanshná

(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto. ² Chora canÿe boyabása bacna nguayanánaca šocá Jesúsbioye tojanobeconá, chabe delante yojoshamentšiyeye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenÿanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

⁴ Jesús chë shnanábioye tbojaniyana: —Mouena, ndocnábeñe cattsecuéntaye; nÿe chë Jerusalenoca báchnëbioye motsa, y cha cochjinÿinÿiyeye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nÿetscanga chamotatsšëmbona mora aca ya ndoñe šocá contsemnama ca —Jesús tbojaniyana.

*Jesús canye Romano soldadengbe amëndayabe
bochichnayábioye tbojanshná
(Lc 7.1-10)*

⁵ Jesús Capernaumoye tojánamashëngo ora, canye Romano soldadengbe amëndayá Jesúsbioye tojanobeconá canye pavorama jaimpádama.

⁶ Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadengbe amëndayá tbojaniyana: —Señor, atše merecido taitatobuajoñe atšbe yebnentše chacuamashënguama; nye mayana y atšbe bochichnayá tšabá echántsatsmëna.

⁹ Atšbioye mándayënga atše sëndábamna y átšnaca soldadengbe amëndayá sëndmëna. Atše canye soldado stjauyana “motsa ca”, cha cachora jana; y inya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nÿets Israelentše ni canya quem boyabasacá Bëngbe Bëtsábeñe nÿetsá ošbuachiyá chiyátinÿena. ¹¹ Y šcuayana, shinÿe bocanoicana y shinÿe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiama Bëngbe Bëtsabe amëndayoca, cánÿiñe juasama. ¹² Ba

Israeloca entsanga, chë ndëmuanyëngbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojaniana: —Ache yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojsatsmëna.

Jesús, Pédrëbe uambén mamábioye tbojanshná
(Mc 1.29-31; Lc 4.38-39)

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontsé chënga jobuácuedana.

Jesús ba šoquënga tojanashná
(Mc 1.32-34; Lc 4.40-41)

¹⁶ Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná.

¹⁷ Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

*Chë Jesús juastama bošënga
(Lc 9.57-62)*

¹⁸ Jesús tojánanÿe mallajta entšanga chabe shëconana; as tojanmandá uafjónaye chengwana jama. ¹⁹ Chorna, canÿe ley abuatambayá Jesúsbioye tbojanobobeaconá y tbojanianyana: —Buatëmbayá, atše séntseboše aca juastama, ndëmoye chacojtsá choye ca.

²⁰ As Jesús tbojanianyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹ Chora inÿa, cach uatsjendayënguentšá, Jesúsbioye tbojanianyana: —Bëngbe Útabná, šmoleenciá atšbe taitá chjshesabotbontsañe ca.

²² Chora Jesús tbojanjuá: —Nÿe šmasto. Chë Bëngbe Bëtsabiamama mo obanëngcá, ntšamo Bëngbe Bëtsá yomandacá ndoñe tmonsama causa, chënga cachëngbe obanënga chamotsëtebuantsañe ca.

*Jesús chë binÿia y chë béjaye bonguana
yojëtsbema
(Mc 4.35-41; Lc 8.22-25)*

²³ Chentšana Jesús canÿe barquëshoye tojánamashëngo y chabe uatsjendayënga imojtsetjëmbambnaye. ²⁴ Ndeolpe tša jabuache binÿia chë uafjónaye béjajiñe yojóshjango; nÿetšá jabuachana yojtsemna, chë olëshënga barquëshimojtsëtšbotsana. Y Jesús chora inétsomañe. ²⁵ As chabe uatsjendayënga tmojána Jesús jetsefšenama

y tmojaninyana: —¿Bëngbe Utabná, šmatsebacá. Montsenatjěmbambana ca!

²⁶ Chora Jesús tojaněyana: —¿Ndáyeca tša šmojtsauatja? ¿Tša batsatema šmojtsošbuaché, Bëngbe Bětsá tšëngaftanga jujuabuáchama yobenama ca?

Chca tojaněyana y tojantsbaná. Chora tojanmandá chě binýia y chě búyeshe bonguana chaot-satsmënema, y lempe natjěmbana yojtsatsmëna. ²⁷ Chabe uatsjëndayënga ojnánänënga imojtsemna y mëntšá imojtsichamo: “¿Nda quem boyabása yomna? Cha tonjayana y chě binýia y chě búyeshe tmonjoyeuná ca.”

Chě Gadara luaroca entšata, bacna bayějbe juabna uambayata

(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canýe luare Gadara ca uabáinentše. Chorna chě utabuantsánëngbentšana útata, bayějbe juabna uambayata, tbojánbocna y Jesúsbiuye tbojanobobéconata. Puerte tšatjayata ibnamna, chíyeca entšanga ndoñe ntsobenana chějana jtsachnějuanana; ²⁹ y chora tbojanontsé chě bacna bayějëngbeyeca mëntšá uayebuáchana: —¿Ndayá bëngaftaca cojtseboše, Jesús, Bëngbe Bětsabe Uaquiñá? ¿Moye tcojabo bënga chafsufrima, chama cabá ndoñe chě tempo yontsemna ora ca?

³⁰ Chentša béconana ba cotsënga imnajena y chënga imnétsosañe. ³¹ Y chě bayějënga Jesús tmojanimpadá: —Muentšana jésebocanama aca tco-

jamëse, cochjama bënga chë cotsëngbeñe fchayamashjnama ca.

³² Y Jesús tojanéyana: —Motsajna ca.

Chora chë bayëjënga chë boyabásatbentsana tmojésanbocana y chë cotsëngbeñe tmojánamashjna; cachora chë cotsënga batsjocana penëšëjana uafjajónayoye imojtsoshbuetše y yojtsatajo.

³³ Chora chë cotsënga anýenënga tmojtsanacheta, y chë puebløye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. ³⁴ Chora nýetsca entsanga chë pueblentšana tmojánbocana y Jesús yojtsemnoye tmojána. Chë entsanga Jesús tmojáninýe ora, tmojanimpadá chë luarentšana chaueseboचना.

9

Jesús, canýe jama ndobenábioye tbojanshná
(Mc 2.1-12; Lc 5.17-26)

¹ Chca tojanopasá chentšana, Jesús canýe barquëshoye tojánamashëngo, uafjajónaye chenguana tojána y cachabe puebløye Capernaumoye tojtanashjango. ² Chora,

canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bétsobenama; as chë šocábioye tbojaniyana: “Sobreno, añemo matsca; acbe bacna soyënga tcbontsebooperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe

Bëtsabiamá; mo chábioye cuafjoyenguangcá entsemna ca.”⁴ Pero Jesús yojtsetátšëmbo ntšamo chënga imojtsejuabnáyca; chíyeca tojanéyana: “¿Ndáyeca nýetšá bacna juabnënga ainaniñe šmojtsebomna ca? ”⁵ ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’? ”⁶ Atše cbochanjínýanýiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojaníyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe. ⁸ Chca tmojáninýama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

*Jesús, Matéobioye tbojanchembo chabuastama
(Mc 2.13-17; Lc 5.27-32)*

⁹ Jesús chentšana tojtsanoñe y canýe entšábioye tbojáninýe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojaníyana: “Šmasto ca.” As Mateo chentšana tojéftsantsbaná y tbojanasto.

¹⁰ Jesús cach Mateobe yebnentše yojtseye ora, banga Romocama impuesto entšángbioye atjanayënga y ínýenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiamá. ¹¹ Chë fariseunga chca tmojáninýe ora, Jesusbe

uatsjéndayëngbioye tmojanatjá: —¿Ntsámo chca yojtsemna, tsëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë shoquënga aíñe. ¹³ Smochjá y ntsámo ndegombre iuayancá smochjuatsjinÿe quem Bëngbe Bëtsabe uabemana palabrénguiñe:

Atse sëntseboše tsëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Atse ndoñe chiyátabo chë Bëngbe Bëtsabe bominiñe tsábá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuéntama tondaye saytescama

(Mc 2.18-22; Lc 5.33-39)

¹⁴ Chentsana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentsana mochantsánatseñe; chora cocayé chë ófjanënga tondaye más jasama

quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

¹⁶ “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanécanana, y chca chë uátanëcniñe más bëtsiñe jtsabemana. ¹⁷ Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama
(Mc 5.21-43; Lc 8.40-56)*

¹⁸ Jesús entsanga yojtsëtsëtsnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojshamentšiye. Chë mandayá tbojaniana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

¹⁹ Chentšana Jesús y chabe uatsjëndayënga chë mandayá tmojanasto. ²⁰⁻²¹ Imojtsaye ora, canye shembása stëtšoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nye mo chabe entsáyá

sibiájua chaijuábojajo, salud chantinýena ca.”
Chentsana chë šocá Jesusbe entsáyá tojanábojajo.

²² Tojanábojajo ora, Jesús tojanobuértana, chë shembásabioye tbojáninýe y tbojanianyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatmëna ca.” Y cach orscana cha tšabá yojtatsmëna.

²³ Chënga tmojtëtanontsé ayana y chora chë mandayábioca chënga tmojánashajna. Chentse Jesús tojánanýe, ínýengna chë veloriamama imojtsanflautaye y ínýengna tša imojtsošachiye. ²⁴ Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nýe endëtsomañe ca.”

Pero chë entsanga Jesúsbioye nýe imojtsáfchaye. ²⁵ Pero Jesús pronto chënga chë yebnentsana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacushache y cachora chë shembásetema tojtantsbaná. ²⁶ Y nýets chë luarëjana ndayá Jesús yojamama nýetsca entsanga imojátatsëmbona.

Jesús uta jtanata tojanashná

²⁷ Jesús chentsana tojëftsanbocna ora, uta jtanata tbojanasto y mëntšá ibojtsaiuáye buache: —¿Davídbentsana Entšá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojaněyana: — Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinýama ibojtsobena. Jesús bětscá chata mēntšá tojanamēndá: —Ndocná más quem soye chaondětsetatšēmo ca.

³¹ Pero chata chentšana tbojěftsanbocna y cachora tbojanontšé ndayá Jesús chátaftaca tojanmama nýets chē luarējana jacúntana.

Jesús, canýe nděbiábioye tbojanshná

³² Chē jtanata ibojtsebocanēntscuana, básefta entšanga canýe nděbiá, bacna bayějbe juabna uambayá, Jesúsbioye tmojanamba. ³³ Jesús chē bacna bayēja chábentšana tbojtanábocna y cachora chē nděbiá tojtanontšé oyebuambnayana. Entšanga ojanánēnga imojtsichamo: “¡Ndocna te Israelentše chca bētš soye chemuáisinýe ca!”

³⁴ Pero chē fariseunga imojtsichamo: “Cach bacna bayějēngbe amēndayá, Satanás, muábioye obenana tbojatštá chē bayějēnga entšāngbentšana jtěbuacanama ca.”

Jesús entsangbiana tbojanongmé

³⁵ Jesús nýetsca pueblēnguējana y luarēnguējana yojtsachnějuana y chē judiēngbe enefjuana yebnēnguenache entšanga yojtsabuátambaye. Yojanabuayiyná chē tšabe noticiēnga Bēngbe Bētšabe amēndayama, y nýetsca šocanēngama y tsetšanama yojánashnaye. ³⁶ Y chē entšanga tojánanýe ora, puerte tbojanongmé. Er chēnga imojtsemna mo abuajěnyā ndbomna oveshēngcá, puerte uamēntšnayēnga ba soyēngama padecena causa, y chaújabuachama ndocná

ntsebomncá. ³⁷ Chora chabe uatsjéndayënga tojanëyana: “Canÿe bëts jajañe bëtscă játbanama entsemna, pero peonga nÿe báseftanga. Cachcă quem luarentše, bëtscă entšanga Bëngbe Bëtsábioye nduabuátmënga montsemna, y chëngbioye chabiamá abuyiynayënga nÿe báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcă, Bëngbe Bëtsábioye moimpadanga ba abuyiynayënga chauichamoma, quem entšanga chábioye chamúbuajama ca” —Jesús tojanëyana.

10

Jesús chë bnëtsana uta uatsjéndayënga tojanabacacá

(Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjéndayënga, y obenana tojanatšatá bacna bayëjëngbe juabna entšángbentšana jtabocnama y nÿetsca šocanëngama y tsetšanama jashnayama.

² Chë bnëtsana uta uatsjéndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³ Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšiñe Jesúsbioye boshjuaná.

Jesús, chabe bnětsana uta uatsjéndayēnga tojanichamó, Běngbe Bětsabe aměndayama jábuayenama (Mc 6.7-13; Lc 9.1-6)

⁵ Jesús chě bnětsana uta boyabásenga tojanichamó chě tšabe noticiēnga entšanga jábuátambama, y měntšá tojanabuayená: “Chě ndoñe judiēngbeñe ndoñe šmattsana y ndaye pueblentše Samaria luaroca ndoñe šmatjěftsamashjna. ⁶ Nye Israeloca pueblēngoye šmochjá. Choca entšanga mo ótsena oveshēngcá montsemna, Běngbe Bětsábioye corente nduabuatma causa. ⁷ Smochjá y entšanga šmochjábuayenaye Běngbe Bětsabe aměndayana echanjóshjanguama. ⁸ Chě šoquēnga šmochjáshnaye, šmochjama chě obanēnga chámuatayenama, bacna nguayanánaca šoquēnga šmochjáshnaye y bacna bayějēngbe juabna entšāngbentšana šmochtábocna. Chě obenana šmonjójyēngacñe tondaye ntjětsjajuacá; cachcá, chě soyēnga šmojtsamama tondaye entšanga šmattsayēngacaye.

⁹ “Ndoñe šmattsambaye crocénana uasnaněchiñe. ¹⁰ Ni shecnaja sanaca benachiñama, ni inye entšayá jtsenomódama, ni shecochětjoněshēnga, ni jatjoněfja, er chě tšabe trabajayá jtsomerecénana ntšamo tbojtsajabotcá jójyēngacñama.

¹¹ “Nderado canye běts pueblentše o base pueblentše chašmojášhajna ora, šmochjánguango canye tšabe entšá, ín्यēngbioye ndaingñayá, y chabe yebnentše šmochtsoquedañe, inye puebloye játantscuana. ¹² Canye yebnoye chašmojámashjna ora, nyetsca chentša oyenēnga

mëntšá šmochjácheuaye: ‘Chë bəngbe ainaniñe tšabe ebionana tšəngaftangbe ainaniñe chaotsemna ca.’ ¹³ Chë yebnentša entsanga ainaniñe tšabe ebionana jtsebomnama merecido tmojtsebuajonëse, chë tšəngaftangbe ainaniñe tšabe ebionana chəngaftaca chaotsemna. Ndoñesna, nÿe cach tšəngaftangaftaca chaotsomñe. ¹⁴ Y nderado canÿe pueblentše o bəts pueblentše chë entsanga ndoñe tcmonjúbuaja y ndoñe tcmonjóyaunase, chentsana šmochjésebecana y chë shecuatšentša polvəshe šmochjésenstoto. Chca, chë entsanga mochántsetatšəmbo chənga tšəngaftangaftaca ndoñe tšabá tmonjamama. ¹⁵ Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bəngbe Bətsá puerte jabuache echantsacastígaye, y chë bacna entsanga Sodoma y Gomorra luaroquəngna ndoñe nÿa nÿetšá jabuache queochatacastígaye ca” —Jesús tojánayana.

Ntsamo chë uatsjəndayənga mochjansúfria

¹⁶ “Šmochjouena. Atše cbontsachamná mo oveshənga cuenta tjañe quešəngbeñe. Chíyeca studio bomnənga mo mətšcuayəngcá šmochtsemna y uamanənga mo palomateməngcá. ¹⁷ Entšangbiana cuedado šmochtsebomna, chəngbe pueblentša aməndayəngbe cucuatšiče tšəngaftanga cmochanjábashejuana y chəngbe enefjuana yebnənguenache cmochanjátsetšenaye. ¹⁸ Atšbe ústonənga bətsemnama, mandadəngbioye y reyəngbioye cmochanjunatse. Y chca, tšəngaftanga šmochanjobenaye chəngbeñe y

chë ndoñe judiëngbeñe ntšamo atšbiamá šmotatšëmbcá jóyebuambayama. ¹⁹ Pero chë mandadëngbe cucuatšinë chacmojábashejuana ora, ntšamo o ndayá šmochjayanama ndoñe šmattsenócochinÿena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. ²⁰ Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

²¹ “Y canÿe entšá cachabe catšátbioye uayayëngbe cucuatšinë bochanjáboshjona chamotsóbama; y canÿe taitá cachabe uaquiñábioynaca. Y chë básenga chëngbe bëtsëtsangbe contra mochántsemna y uayayëngbe cucuatšinë mochanjábáshejuana chamotsëbáyama. ²² Tšëngaftanga atšbe ústonënga bëtsemnama, nÿetsca entšanga cmochantsébuayënja; pero nda nÿets tempo átšbeñe ošbuachiyá chaotsomñá, atsbocaná echántsemna. ²³ Canÿe pueblentše chacmojtsëcamena ora, inÿe puebloye šmochtsacheta. Ndegombre cbëyana, Israelentša nÿetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

²⁴ “Ni canÿe uatsjendayá chabe bu-atëmbayabiama más uamaná ntsemnana, ni chë oservená chabe nduiñbiama más uamaná. ²⁵ Chë uatsjendayá ya cachabe buatëmbayacá jtsemnama tojashjáchëse, ndayá más nanjátšboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canÿe yebnentša taitacá y tšëngaftangna mo cach yebnentša

basengcá. Entšanga jtsichámuana atšna Beelzebú o chë bacna bayëjengbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanéyana.

Nda ndegombre cuantsebiauatja

(Lc 12.2-7)

²⁶ “Chíyeca entšangbiana ndoñe matauatjëngana. Chë yoiytëmena soyentšana tondaye ntjinýcá queochaisoquéda, y chë ndótatšëmbo soye, ntsotatšëmbcá queochaisoquéda. ²⁷ Chë mora cbontsëtsësná soyënga, chë entšangbiana mo ibetiñe cuaftsemncá soyënga, tšëngaftanga šmochjama entšanga botamana chama chamotsetatšëmbuama. Y chë iytëcana cbontsëtsësná soyënga nyetsca entšanga šmochtsabuayiynaye, mo nda canye yebnentša tsbanánocana noticiënga tojtsayebuachcá. ²⁸ Ndoñe matauatjëngana nye chë tšëngaftangbe cuerpo japochócama imobenëngbiana y ainana jtsepochoócama ndoñe ntsobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochoócama, nyetsca tescama infernoca.

²⁹ “Uta jaja shloftsetémata nye canye denario crocenánama mondbétsena. Masque chca, ni cányetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. ³⁰ Y tšëngaftangbiana, Bëngbe Bëtsá botamana jtsantješnana, y chca, cha lempe tšëngaftangbiana jtsetatšëmbuana, bueta stjënashënga tšëngaftangbe bestšasiñe yomnámnaca.

³¹ Chíyeca ndoñe matauatjëngana, tšëngaftanga

ba jaja shloftšetémëngbiana corente más šmonduámana ca” —Jesús tojánayana.

Ndabiana Jesucristo yochjayana chabe entśá yomna ca

(Lc 12.8-9)

³² “Nda atśbe entśá yomna ca entśangbe delante tojayanabiana, átśnaca, atśbe Taitá, chë celoca endmënabe delante chanjayana cha atśbe entśá yomna ca. ³³ Pero nda entśangbe delante atśbe entśá ndoñe yondmëna ca tojayanabiana, átśnaca, atśbe Taitá, chë celoca endmënabe delante chanjayana cha atśbe entśá ndoñe yondmëna ca” —Jesús tojanéyana.

Jesube causa, entśángbeñe más jtsentsjanayana
(Lc 12.51-53; 14.26-27)

³⁴ “Ndoñe šmattsejuabnaye atśe quem luaroye tijabo nyetsca entśanga natjëmbana chamotsiyenama. Atśe chama ndoñe chiyátabo; atśe sënjabo causa, entśanga más mochántsejtsjanaye. ³⁵ Atśe sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebinuá chabe uambén mamabe contra chaotsemnama. ³⁶ Y chca, ba entśangbe uayayënga cachëngbe pamíllanga mochántsemna.

³⁷ “Nda cachabe taitá o mamábioye atśbiana más tbojtsebobonshánëse, cha ndoñe ntsomerecénana atśbe entśá jtsemnama. Nda cachabe uaquiñá o bémbëbioye atśbiana más tbojtsebobonshánëse, cha cach ndoñe. ³⁸ Y nda nyetsca chabe quem luare soyënga ndoñe tonjëseboshjona atśe juastama, y atśbiana jasúfriama ndoñe tontseprontana y cruciñe

jobanámnaca, cha ndoñe ntsomerecénana atšbe entšá jtsemnana. ³⁹ Nda tojtsentšena quem luarentše bëtscá soyënga jtsebomnana y atšbiama jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atše juastama, masque chaóbana, chë nyetsca tescama yomna tšabe vida echántsebomna ca” —Jesús tojánayana.

*Chë uacanana soyënga
(Mc 9.41)*

⁴⁰ “Nda tšëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. ⁴¹ Nda canye Bëngbe Bëtsabe juabna oyebuambnayábioye tbojoyeuná, cha chca bétsemnana, chábioye Bëngbe Bëtsá canye uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochántatšetaye, mo cach nyetsca soyënguiñe tšabá amabe uacanana soycá. ⁴² Y ndánaca, tšëngaftanguentšá canye nduamanábioye masque nye mo base búyeshtema tbojuabuatšetá, atšbe ustoná bétsemnayeca, ndegombre Bëngbe Bëtsá canye uacanana soye chábioye bochántatšetaye ca” —Jesús tojánayana.

11

*Juan chë Ubayanabe ichmónënga
(Lc 7.18-35)*

¹ Jesús tojanpochocá chabe bnětsana uta uatsjéndayēnga jábuayenama, y chentsana tojtsanoñe chě luariñe pueblēnguenache oyena entsanga Bēngbe Bětsabe palabra jabuátambama y jábuayenama.

² Chě tempo Juan chě Ubayaná cárceloye tmojanětame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonēnga tojanichamó, ³měntsá jatjayama: —¿Aca ndegombre cojtsemna chě jabama ibojanmēná, chě Uámana Uabuayaná, o šojtsamna ínñabiana jatobátmama ca?

⁴ Chca tmojantjá orna, Jesús tojanějua: —Smochjá y Juan šmochjauyana ntšamo šmojouena y šmojinýcá. ⁵ Cha šmochjacuénta: Chě jtanēnga tšabá entsatēbinýna, chě coshetēnga tšabá montsatana, chě bacna nguayanánaca šoquēnga shnánēnga montsatsmēna y chě tēsmēnga montsuenana, chě obanēnga tmontayena y chě ndbomnějmēngbioye chě tšabe noticiēnga montsabuayiyná ca. ⁶ ¡Puerte oyejuayá chaotsemna chě nda atše bacna soye ndoñe stsama ca jtsejuabnaye, átšbeñe ošbuáchiyana ndoñe tontsajbaná cha ca! —Jesús tojaněyana.

⁷ Chēnga tmojtsatanoñe ora, Jesús tojanontsé Juanbiana chě entsanga jáuyanana, mēntsá: “Juan jinýama šmojánbocana ora, ¿ndayá jinýama chě entsanga ndoyena luaroye šmojánbocana? ¿Canýe entsá ainaniñe tondaye añemo ndbomná, mo canýe šěše bínñiaca shatiyeyněscá? ⁸ Y ndoñese, ¿ndayá jinýama choye šmojánbocana? ¿Canýe boyabása uámana entsayaca bopormaná?

Ndoñe. Tšëngaftanga šmondétatšëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama. ⁹ Y asna, ¿ndayama choye šmojánbocana? ¿Canye Bëngbe Bëtsabe juabna oyebuambnayá jinýama? Ndegombre, aíñe; y cbëyana, ndegombre cha canye Bëngbe Bëtsabe juabna oyebuambnayabiama más bëtsá endmëna. ¹⁰ Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntsá tojánayana ora:

Cristo, atšbe entšá natsana sënjichmó acbiama chaóyebuambama,

entšanga jábuayenama aca jabama ainaniñe tšabe juabnëngaca chamotseprontánama ca.

¹¹ Ndegombre cbëyana: Nyets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

¹² “Juan chë Ubyaná tojánabo orscana mëntscoñama, bëts cá entšanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nyets añémoca montseboše chë mándayana jtsepochoçama. ¹³ Juan candabëntscuana, nyetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá. ¹⁴ Y tšëngaftanga chë soyënga jýëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. ¹⁵ Chë jouenama

tmojtsobenënga, chamouena ca” —Jesús tojánayana.

¹⁶ Mëntśánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámána basetemëngcá; chënga chëngbe enutëngbioye jtsayebuáchana

¹⁷ y mëntśá jtsichámuana: “Tšëngaftangbiamá fsënjaflautá y ndoñe chešmatslantsá; ngménaca fsënjaversiá y ndoñe chešmatošachna ca.’

¹⁸ Juan tonjánabo, y bëtscá entsángbeñe ndoñe quenjatamana ni jasana, ni jofšiyana, y entsanga montsanichamo chana bacna bayëjbe juabna uambayá yojamna ca. ¹⁹ Morna, chë Bëngbe Bëtsá Entśá tbojanbemá tonjabo, y chana aiñe entsamana bëtscá entsángbeñe jtsesayana y jtsofšëšnayana, y entsanga montsichamo chana yapa uasayá y vínoye tmoyá entsemna ca y Romocama impuesto entsángbioye atjanayënga y bacna soye amëngbe amigo ca. Pero Bëngbe Bëtsá endbétsinÿanÿnaye cha nyets osertánana bomná yomnama, chë ndayá cha tojama ora ndayá chentšana tojóbcna soyëngaca ca” —Jesús tojánayana.

Chë nduauenana entsanga

(Lc 10.13-15)

²⁰ Chentšana Jesús tojanontsé jucácanana chë entsanga, ndëmuanÿnga imojoyena chë públënguiñe ndayenache ba chabe bëtš soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntśá yojtsichamo:

²¹ “¡Tša lastema, Corazín puebloca entsangbiamá!

¡Tša lastema, Betsaida puebloca entsangbiámnaca! Chë chentše sënjama bëts soyënga, Tiro y Sidón bëts pueblënguentše matënjochnënguse, chentša bacna entsanga ya tempo ngménaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatsëmbuama uajojësha entsayangaca matmëntopormanga y chëngbe bestšašiñe jatinyá matmënjenotbótoto. ²² Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebonna, chë Tiro y Sidonoca bacna entsangbe castiguama. ²³ Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe. ²⁴ Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nyetsá jabuache quemochatacastígaye ca” —Jesús tojánayana.

“Atšbioye mabënga y šmochjóchna”

(Lc 10.21-22)

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nye batsá tatsëmbënga tcojanÿanyé, chë

tša tatsëmbënga y osertánëngbiamá tcojaiytëme soyënga. ²⁶ Aíñe, chama cbontsadorana, Taita, chca chaotsemnama tcojábošenayeca.

²⁷ “Atsbe Taitá lempe chca šonjatstá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndábioye chë Uaquiñá tojtseboše ndá chë Taitá yomnama jinýanýiyama, chánaca chë Taitábioye bochantsábuatma.

²⁸ “Atsbioye mabënga nýetsca tsëngaftanga uamëntšnayënga y bëtscá trabajo uangménënga, y atše chanjama tsëngaftanga chašmochnama.

²⁹ Ntsamo canýe entšá, uacná yuguëšiñe juabatsëcana juanatsama, cachcá, tsëngaftanga atše šmochjaleséncia jobnatsayama y jabuátambama. Atsbentšana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tsábá jóchnama šmochantsobena y ainaniñe más añemo šmochántsebmna. ³⁰ Mo canýe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tsëngaftanga šmochántsemna atše cbojtsabnatsana y cbojtsabuátambase; y chca, tsëngaftanga más oyejuayënga šmochántsemna y más paselo nýetsca soyënga jamama echántsemna ca” —Jesús tojánayana.

12

Jesusbe uatsjëndayënga ochnayté trigo

*tmojanátabebe**(Mc 2.23-28; Lc 6.1-5)*

¹ Chë tempo, Jesús canÿe ochnayté canÿe jajajana yojtſachnëjuana. Chabe uatsjëndayëngna shëntseca imojtsemna, chíyeca tmojanontsé trigo juatabebiana y chë meshënga jasana.

² Chë fariseunga chca tmojáninÿe ora, Jesús tmojanianyana: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátſlesenciana ca.

³ As Jesús tojanëyana: —¿Ndoñe ſmëndualía y ſmondétatſëmbo ndayá David y chabe enutënga tmojanmama, shëntseca imojtsemna ora? ⁴ Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentſe yojamnama inÿinÿnaye tandëſënga yojase. Chë tandëſe nÿe ndánaca jasama ndoñe yonjalesenciana, ni Davidbiama, ni chabe enutëngbiama. Nÿe bachnangbiama belesenciana chë tandëſe jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. ⁵ ¿O ndoñe ſmëndualía y ſmondétatſëmbo, Moisesbe leyiñe, chë bachnanga ochnayté Bëngbe Bëtsabe bëts yebnentſe jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? ⁶ Y atſe ſcuayana: Muentſe canÿa entsemna, cha chë Bëngbe Bëtsabe bëts yebnentſa bachnangbiama más uamaná endmëna y chabe amëndayoca soyënga más entsámana chë bachnangbe mándayentſa soyëngama. ⁷ Bëngbe Bëtsabe uabemana palabrënguiñe mëntſá

endayana:

Atše sěntseboše tšěngaftanga lastemaděnga
chašmotsemna,
y ndoñe nŷe bayěnga chašmotsěbánye Běngbe
Bětsá jětschuayama ca.

Ntšamo chiñe entsayancá ndegombre
cmojtsěsertáněse, tšěngaftanga ndoñe chěngbe
contra šmattsichamo, chě ochnayté chca
tmojtsaměngbiama. ⁸ Chě Běngbe Bětsá Entšá
tbojanbemá, chě entšá ochnayté tojtsama sóynaca
jtsemándayana ca —Jesús tojánayana.

Chě buashana cucuatše bomna entšá
(Mc 3.1-6; Lc 6.6-11)

⁹ Chentšana Jesús tojtsanoñe y chentša judiěngbe
enefjuana yebnoye tojánamashěngo. ¹⁰ Chentše
yoytsemna canŷe boyabása buashana buacuatše
bomná. Chě fariseunga imojtsenguaye ndayánaca,
as chca chěnga jtsebomnama ndaye sóyeca Jesús
mal jaquédama. Chcasna, chora chěnga Jesús tmo-
jantjá: —¿Queojtselesenciana canŷe ochnayté šocá
jáshnama ca?

¹¹ Y Jesús tojanějua: —¿Nda tšěngaftanguentšá,
canŷe oveshá tbojtsebomna y nŷa chě ochnayté
canŷe fshantsentše atěfjnoye chě oveshá
tojtsótsatše, chora chě boyabása nanjá o ndoñe chě
oveshá jatábocnama? ¹² ¡Entšá oveshabiama puerte
más uamaná endmēna! Chcasna, entselesenciana
chě ochnayté tšabe soye jamama ca —Jesús
tojaněyana.

¹³ Chora Jesús chě buashana buacuatše
bomnábioye tbojaniyana: “Macuenŷanějaná ca.” Y
chě boyabásana tojanacuenŷanějaná y chora chětsa

tšabá yojtsatamna mo cach inyetsacá. ¹⁴ Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbiama tojánayana

¹⁵ Jesús chë soye tojántatsëmbona ora, chentsana tojtsanoñe y ba entsanga tmojanasto. Nyetsca šoquënga tojanashná, ¹⁶ y tojanamëndá chabiama entsángbeñe ndoñe chamondëtsóyebuambnama. ¹⁷ Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

¹⁸ Muentše atšbe oservená entsemna. Atše cha sënjabocacá,
atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnama
y entsanga echanjabuayená, Bëngbe Bëtsá nyetsca luarënguentsana entsángbiama yochjayanama chënga tšabá o ndoñe tšabá tmonjamama.

¹⁹ Cha ndoñe queochátayajuatsana, ni queochátschembumbuana.
Chabe oyebuambnayana tsáshenañe ndocná queochatuena.

²⁰ Mo nda chë atcana šëse ndoñe más jatsndbem-ana,
chë ndobenënga cha ndoñe queochátapochocaye.
Mo nda chë quinýenëfjua nýe uabojátsena uajuinýenëfjua ndoñe ntsafsanana,

chë Bëngbe Bëtsábeñe jtsošbuáchiyama imojtsebojátšangbe obatanana chábeñe, cha ndoñe queochátabuajuanaye.

Cha nÿets añémoca echanjëftsetrabája, entšanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

21 Y nÿetsca luarënguentsana entšanga chábeñe mochantsobátmana ca —cha tojánayana.

Fariseunga tmojánayana Jesús Satanásbentsana obenana tojanóyëngacñe ca

(Mc 3.20-30; Lc 11.14-23; 12.10)

22 Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínÿnama y chabuatauénanama.

23 Y nÿetsca entšanga ojnanánënga imojtsichamo: “¿Mua yojtsemna chë Davídbentsana Uámana Entšá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

25 Y Jesús yojtsetátšëmbo ntšamo chënga imojtsejuabnayama; as tojanëyana: “Canÿe amëndayentše entšanga tmojtsenojátá y tmojtsenáyase, cachënga jenpochócana. Cachcá, canÿe bëts pueblentša entšanga o canÿe yebnentša pamíllanga tmojtsenojátá y ndoñe tmontsenëyeunanëse, chënga ndoñe tšabá nÿets tempo quemochátsmëna. 26 Cachcá, Satanás cachabe bayëjënga jtëbuacnama tojtsebošëse, chana tojtsenojátá y cachabe contra yojtsemna.

Y chca, ¿ntšamo nantsobena chabe mándayana quem luarentše jěftsebmna? ²⁷ Tšəngaftanga šmotsichamo atše Beelzebube obenánaca chě bayějənga stsatəbuacana ca; pero chca ndegombre tojtsemnəse, ¿ndábeyeca tšəngaftangbe usetonənga obenana imojtsebmna chě bacna bayějənga jtəbuacnama? Chíyecna, chənga montsinjəyná ntšamo ndegombre yomnana y tšəngaftanga ndoňe ndegombre soye šmotsichámuama. ²⁸ Y atšna, chě Bəngbe Bətsabe Espíritbeyeca chě bayějənga entšəngbentšana səndətəbuacana; y chě soye entsinjəyná Bəngbe Bətsabe aməndayana tšəngaftangbioye tojóshjanguama.

²⁹ “¿Ntšamo nda nanjobenaye canjə corente añemo bomna entšabe yebnoye jamashənguana y chabe soyəngajtsebocana, ndoňe natsana chábioye tconjshétsebatsəquəse? Njə tcojshétsebatsəquəсна aíňe cuanjobenaye cha jəfcana. Atše ya chca Satanášoftaca sənjama.

³⁰ “Nda ndoňe átšeftaca tontsemná, atšbe uayayá jtsemnana. Y nda átšeftaca ndoňe tontsetrabája, chana atšbe contra jtsetrabájayana.

³¹ “Chíyecna cbəyana, Bəngbe Bətsá entšanga echanjáperdonaye njətsca chəngbe bacna soyənga y chě Bəngbe Bətsabiana puerte bacá oyebuambnayana, mo chábioye cuafjoyenguangcá; pero ndoňe queochátaperdonaye chě Uámana Espíritbiana puerte bacá ichámənga.

³² Bəngbe Bətsá bochanjaperdóna chě Cha Entšá tbojanbemabiana ndoňe tšabá ichamuábioye; pero chě Uámana Espíritbiana ndoňe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

*Tšabe betiye o ndoñe tšabe betiye tondmënama,
jtsotatsëmbuana ntšamo tojashajoncá*

(Lc 6.43-45)

³³ “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. ³⁴ ¡Mëtscuaye entšanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entšanga šmojtsemnëse? Er ndayá ainanoca becá tomnama entšá jtsóyebuambnayana. ³⁵ Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entšana chë ainanoca bacna juabnënga tobomnentsana jtsóyebuambnayana. ³⁶ Y ndegombre cbëyana, chë entsangbiamama tšabá o ndoñe tšabá tmonjamama jayanama tempo chaojobuache ora, ndaye ndoserverna palabra šmojóyebuambama, Bëngbe Bëtsabe delante šmochanjayana ndáyeca chca ca. ³⁷ Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnama ca” —Jesús tojánayana.

*Chë bacna entšanga Jesús tmojanimpadá canÿe
bëts soye chaoma, chabe obenana jinÿama*

(Lc 11.29-32)

³⁸ Chentšana, básefta fariseunga y Moisesbe ley abuátambayënga Jesús tmojantjá: —Buatëmbayá,

bënga fsëntseboše aca canÿe bëts soye chacoma, acbe obenana chašcuinÿanÿema ca.

³⁹ As Jesús tojanějua: —Quem puerte bacna entšanga y ndošbuáchiyënga montseboše atše canÿe bëts soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. ⁴⁰ Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna.

⁴¹ Morsca entšanga tšabá o ndoñe tšabá tmonjamama Bëngbe Bëtsá yochjayana te, Nínive bëts pueblocaca entšanga mochanjotsaye y morsca entšangbiama mochanjayana ndoñe tšabá tmonjama ca; er chënga, Jonás yojtsabuayiyay ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. ⁴² Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

*Ndayá inopása chë bacna entšángaftaca
(Lc 11.24-26)*

⁴³ Jesús mēntśánaca tojánayana: “Canje bacna bayēja canje entsábentsana tojésebcna ora, chē bayějna bojojo luarēnguenache jtsanana ndayentše jóchnama onguayiñe, y canje luare ndoñe tonjínjena ora cha jenójuaboyana: ⁴⁴ ‘Atsbe oyenoye, chē ndayentšana sēnjēftsebcnoye chanjesshēcona ca’. Y choye tojtashjango orna, jinjenana lempe tšabá cha jtesamashēnguama, mo chentše ndocná tontsiyencá, tsjajniñe y lempe botamaniñe cuaftsemncá. ⁴⁵ Chorna chē bayějna jana y inje canysēfta bayējēnga chabiamá más opējēnga jobiatšana y nyetscanga choye jamashjnana chē boyabásabeñe joyéanama. Y chca, chē boyabása tempscama más bacna entsá jtsemnana, chora chē natsanama más bayējēnga abamna causa. Morsca puerte bacna entsángaftaca cachcá echanjochnēngo ca” —Jesús tojánayana.

*Chē Jesusbe ndegombre pamíllanguentsēnga
(Mc 3.31-35; Lc 8.19-21)*

⁴⁶ Jesús cabá entsanga yojsētsētsnaye ora, chabe mamá y catśátanga tmojánashjajna y imojtseboše Jesúseftaca jóyebuambayama. Nye shjoca imojtsemna; ⁴⁷ asna, canje boyabása Jesúsbioye tbojanbuayená: —Acbe mamá y acbe catśátanga shjoca montsemna y montseboše ácaftaca jóyebuambayama ca.

⁴⁸ Pero Jesús chē jauenayama tojánabioye tbojaniyana: —¿Nda atsbe mamá yomna, y ndēmuanjēnga atsbe catśátanga ca?

⁴⁹ Y cachora chabe cucuatše tojanatsbaná, chabe uatsjēndayēnga tojanēnyānyé y tojánayana:

—Quemënga montsemna mo atšbe mamacá y mo atšbe catšatangcá. ⁵⁰ Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentšá ca —Jesús tojánayana.

13

Chë jenabe cuento

(Mc 4.1-9; Lc 8.4-8)

¹ Cach te, Jesús yebnentšana tojéftsanbocna y uafjajónaye tsachoca tojanótbema. ² Mallajta entšanga choye tmojanobeconá; as Jesús, chë uafjajónayentše yojanamna canye barquëshoye tojánašëngo, tojanótbema; y chë entšangna tsachoca imojtsemna. ³ Chorna ba soyëngama cuentëngaca chënga tojanabuatambá.

Mëntšá tojanëyana: “Canye jená chë jënaye jaujquëshama yojéftsebocna. ⁴ Yojtsëjquëshaye orna, básefta jënaye benache juachañe yojuatquécjana, pero chë jaja shloftšënga imojástjajna y lempe imojtsósañe. ⁵ Inye meshëngna ndëtsbenguñe yojuatquécjana, ndoñe yapa fshantse binyëntše. Chiña betesco yojuábocna, fshantse ndoñe jashenocana yonjanmëna causa, ⁶ pero shinye yojábocna ora, puerte yojojënyána y yojtsancta; y yojtsábojo, bëtscá tbëtëjënga tondaye causa. ⁷ Inye meshëngna uchmëshangañe yojuatquécjana, y chë uchmëshangá yojuájua orna, lempe yojtsatscué. ⁸ Y inye meshëngna, uanguanëshiñe yojuatquécjana y puerte botamana chiñe yojuashajo: ínÿenache nÿe canye

jénayentšana mo patse meshënga yojuashájona, ínÿeñna mo chnënguana bnëtsana meshe y ínÿeñna mo unga bnëtsana meshe.”

⁹ Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mc 4.10-12; Lc 8.9-10)*

¹⁰ Chora chë uatsjéndayënga tmojanobeconá y Jesús tmojantjá: —¿Ndáyeca entšanga cuentëngaca cojtsabuatambá ca?

¹¹ As Jesús tojanëjua: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe. ¹² Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca.

¹³ Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana.

¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe
queochátësertana.

Masque puerte chamotsantješna, ndoñe
quemochátinÿe

¹⁵ Quem entšanga ndoñe quemátsboše botamana
jajuaboyana;

chënga uamatsáchtönënga montsemna
 y chëngbe bomínÿnaca cachcá.
 Chca ndóñesna, chënga muantsobena jinÿyama,
 jouenama y ainaniñe josértama;
 y chca, chënga bacna soyënga amana
 muantsajbaná y atšbe benache
 muantishache,
 as atše chënga chayatsebacama ca —cha
 tojéftsanbema.

¹⁶ “Tšëngaftangna oyejuayënga šmochanjoyena,
 er šmondobomna bominÿe y matscuašënga
 Bëngbe Bëtsabe soyënga jinÿyama y jouenama.
¹⁷ Ndegombre cbëyana, banga Bëngbe
 Bëtsabe juabna oyebuambnayënga y nÿetsca
 soyënguiñe tšabá amënga tmonjánbošena chë
 tšëngaftanga šmontsonÿá soyënga jinÿyama, y ndoñe
 chemátaninÿe; tmonjánbošena chë tšëngaftanga
 šmontsuenana soyënga jouenama, y ndoñe
 chemátanuena ca” —Jesús tojanëyana.

*Jesús chë jenabe cuentama tojanabuayená
 (Mc 4.13-20; Lc 8.11-15)*

¹⁸ “Chcasna, oído šmochjajajo; chë jenabe
 cuento mëntšá endayana: ¹⁹ Chë Bëngbe
 Bëtsabe amëndayama tmojouena y ndoñe
 tontsésertana entsanga mondmëna mo chë
 benache juachañe yojuatquécjana jenaycá;
 Satanás jabana Bëngbe Bëtsabe palabra chëngbe
 ainanentsana jabétsabuajuanama, chënga chiñe
 ndoñe chamondëtsošbuáchema. ²⁰ Y chë
 ndëtšbenguiñe yojuatquécjana jénaye entsemna
 mo chë aiñe Bëngbe Bëtsabe palabra tmojouena y
 Bëngbe Bëtsábeñe jtsošbuáchiyama oyejuayënga

tmojtsemna entsangcá; ²¹ pero ndoñe nyets tempo chana jochájuaana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga chëngbioye mochantsëbuayënja y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. ²² Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entsangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnama mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. ²³ Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entsangcá. Mo canye betiye puerta tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyëngna ínÿengbiama más bëtscá soyënga mochántsama, y chca, ínÿënga jtsemnana mo chë patse meshënga tojanshajo jenaycá, ínÿënga mo chë chnënguana bnëtsancá y ínÿëngna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

²⁴ Jesús mëntsánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. ²⁵ Pero nyetscanga imojtsomañe orna, chabe uayayá yojáshjango y chë trigo jeniñe bacna

shácuana yojesejé y yojtsatoñe. ²⁶ Y chë trigo yojuájua y ya yojtseshajuana orna, chë bacna shácuaneñaca yojuábocna. ²⁷ As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ ²⁸ Y chë nduiño yojáyua: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bēnga fchayá chë bacna shácuana jetsejashtsētsama ca?’ ²⁹ Pero chë nduiño yojáyua: ‘Ndoñe. Chë bacna shácuana šmojtsejashtsētsana ora, chë trígnaca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná játbanama tempo chaojobuáchēntscuana. Chora chë trabájayēnga chanjichamuá y chanjámēndaye natsana chë bacna shácuana chamotsejashtsētse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquēcjnaye yebniñe chamotsatsuamá ca’ ” — Jesús tojánayana.

Chë mostaztiye jenayama cuento
(Mc 4.30-32; Lc 13.18-19)

³¹ Jesús mēntšánaca tojanacuntá: “Bēngbe Bētsabe amēndayana endmēna mo canýe mostaza betiye jenaycá, canýe boyabása chabe jajañe yojáje. ³² Ndegombre, nýetsca jenayēngama chë mostaza jénaye chë más bāsetema endmēna, pero tojójua orna, chë jajañentse chë más bēts betiye jóbemana. Tša bēts betiye jtsemnana, chiýeca ba buacuashangá jtsabomnana y chë jaja shloftšēnga jana y chiñe uajajonētemēngá jauábopormana ca” — Jesús tojánayana.

*Chë levadurama cuento
(Lc 13.20-21)*

³³ Quem inÿe cuétnaca tojanéyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

*Ndáyeca Jesús entsanga cuentëngaca
yojanabuayiná
(Mc 4.33-34)*

³⁴ Jesús nÿetsca chë soyëngama lempe cuentëngaca entsanga jtsëtsëtsnayana, y cuentëngaca ndóñesna ndoñe yonjanoyebuambná. ³⁵ Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá: Jabuátambamna cuentëngaca chanjóyebuambaye; chanjayana chë iytëmena soyëngama y chë entsanga ndoñe mondëtatšëmbo soyëngámnaca; Bëngbe Bëtsá quem luare tojanma orscana chë soyëngayomna ca —cha tojánayana.

Chë tríguañe bacna shácuana cuentama Jesús tojanabuayená

³⁶ Chentšana Jesús chë entsanga tojtanicamó y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuanama cuento betsayancá chauabuayenama. ³⁷ As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá, ³⁸ y chë jajaña, quem luare. Chë tšabe jénaye entsemna chë Bëngbe Bëtsabe amëndayoye mochjámashjna

entsanga, y chë bacna shácuana entsemna chë bacna bayëjëngbe amëndayabe entsanga, ³⁹ y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga. ⁴⁰ Ntšamo chë bacna shácuana jtsejashtsëtsana y iñoye jtsatmetšana jtsejuinÿiyama, cachcá echántsemna quem luare jopochócama te. ⁴¹ Chorna, chë Bëngbe Bëtsá Entsá tbojanbemá chabe angelotémënga echanjichamuá chë ínÿenga bacna soye chamomama amënga y chë bacna soyënga amënga chabe amëndayentsana chamotsajuanayama. ⁴² Y chora chëngbioye chë uabouana iñeshoye mochantsésetjango y chentše puerte mochanjenóbošachna y chë tsetšanama juatsašënga mochantsenoftëšjojnaye. ⁴³ Chora, chë ntšamo Bëngbe Bëtsá yomandacá amëngna corente mo shinÿcá mochantsebuashinÿinÿana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” — chora Jesús tojánayana.

Chë fshantsiñe uaiytëmena bomnanama cuento

⁴⁴ “Bëngbe Bëtsabe amëndayana endmëna mo chë fshantsiñe uaiytëmena bomnancá. Canÿe boyabása chë bomnana yojuínÿena y chentšana iytëcana cachentše yojesatbontsá. Corente oyejuayá yojtá, nÿetsca chabe bomna soyënga yojetsatobuiye y chentšana chë fshantse yojtobuámiñe ca” — Jesús tojánayana.

Chë corente uámana fjantse ndëtsëtémama cuento

45 “Mo canye entśá uámana fiantse ndětsětémēnga obuamnañacánaca endmēna chē Bēngbe Bětsabe amēndayana. 46 Chana, canye corente uámana ndětsětēma yojínŷena ora, yojtá y lempe chē inabomna soyēnga yojetsatobuiye y chē ndětsětēma yojtobuámiñe ca” —Jesús tojánayana.

Chē atarraiëshama cuento

47 “Bēngbe Bětsabe amēndayana endmēna mo canye atarraiëshacá, buyeshoye jutšenana y nŷetsca beonga jashebuáyana. 48 Chē atarraiëshá jútjena tojtsamna orna, chē beonga ashebuánayēnga jtsashěbjátsēcana, tsachoye juyambana y chentše juatbemana chē beonga jabocacayama; chē tsábēnga sbarēquēnguiñe juatsuámana y chē ndoñe tsábēngna jtsětšanana. 49 Cachcá echanjochnēngo quem luare jopochócama tempo chaojobuache ora. Chē angelotémēnga mochanjábocana chē tsabe entśāngbentšana bacna entšanga jaluárama, 50 y chē bacna entšangna chē uabouana ñeshoye mochántsatquēcjaye, y chentše puerte mochanjenóbošachna y chē tsetšanama juatsašēnga mochantsenoftěšjojnaye ca” —Jesús tojanacuntá.

Anteo y tsēm uámana bomnana

51 Chora chabe uatsjéndayēnga Jesús tojanatjá: — ¿Lempe chama quecmojtsēsertana ca?

Y chēnga tmojanjuá: —Arseñor, añe ca.

52 As Jesús tojaněyana: —Canye ley abuatambayá jtsetatšēmbuana ndayá Bēngbe Bětsá tempo Moisesbiajana yojanoyebuambná soyēngama. Ntšamo Bēngbe Bětsabe amēndayana

bétsemnama cha tojtsatsjendá orna, mo canye yebnentša nduiñcá cha jtsemnana. Chë nduiña chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëgnaca Bëngbe Bëtsabe amëndayama ca — tojanéyana.

Jesús Nazaretoca

(Mc 6.1-6; Lc 4.16-30)

⁵³ Jesús chë soyënga jacuéntama tojanpochocá ora, chentšana tojtsanoñe. ⁵⁴ Y cachabe luaroye tojtanashjango y chentša judiëngbe enefjuana yebnentše tojanontsé jabuátambama. Entšanga ojnánänënga imojtsichamo: —¿Chë lempe yojtsetatšëmbcá ndëmoca mua tojuatsjinye ca? ¿Ntsámo nantsobena chca bëts soyënga jamama ca? ⁵⁵ ¿Mua ndoñe yondmëna chë calpinterbe uaquíñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabëñanga ndoñe muentše bëngaftaca mon-doyena? ¿Ndayentšana lempe chca mua yojtsebomna ca? —chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquénache canye Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

⁵⁸ Chíyeca chentše Jesús ndoñe tonjëftsanna ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

14

*Ntšamo Juan chë Ubayaná tojanóbana
(Mc 6.14-29; Lc 9.7-9)*

¹ Chë tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá. ² As cha chabe oservénënga tojanëyana: “Mua Juan chë Ubayaná ctsemna, obanënguentsana tojtayena, chíyeca chca obenana bëts soyënga jamama yojtsebojna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiana. Herodes chca tojanma Herodíasbe causa, chabe catšata Felipbe shema.

⁴ Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiana yojtsauatja, er chënga ìmnajuabnaye Juan ndegombre Bëngbe Bëtsabe obenánaca yojanoyebuambná ca. ⁶ Pero Heródesbe cumpleño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye. ⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojanianyana: “Canÿe šcneniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. ¹⁰ Y as

tojanmandá chë Juan yojanëtámenoca chabe bestšaše chamuetséstjanguama. ¹¹ Chentsšana, canye šceniñe chë bestšaše tmojanamba y chë tobiäše tmojanëntšabuaché y chana, chabe mamábioye.

¹² Chentsšana, Juanbe ústonënga tmojánashhajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

Jesús shachna uaranga boyabásenga saná tojanacaredadó

(Mc 6.30-44; Lc 9.10-17; Jn 6.1-14)

¹³ Jesús chca tojanuena ora, canye barquëshañe tojtsanoñe canye bën luaroye, entšanga ndoyena luaroye. Pero entšanga chama imojátatšëmbona y chë pueblënguentsšana tmojánbocana shecuátseca cha juastama. ¹⁴ Chentsšana, chë barquëshoicana tojtastjango ora, Jesús ba entšanga tojánanye, chë cha tmojánguanguënga. Chëngbiamama tbojanongmé y chë entšanguentsšana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojanianyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

¹⁶ As Jesús tojanëjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjuá: —Muentše tondaye queftsátsbomna; nye shachna tandëse y uta beónata ca.

18 As Jesús tojaněyana: —Chě soyěnga moye miyěbo ca.

19 Chentšana Jesús tojanmandá entšanga chamoshěntsjatbiamama. Chorna, chě shachna tanděše y chě uta beónata tojanca, celoye tojanontješé y Běngbe Bětsábioye chama tbojtanchuá. Chora chě saná tojanjatá, chabe uatsjédayěnga tojanějátaye, y chěngna nřetsca entšanga tmojanacaredadó. 20 Nřetsca entšanga tmojanse jtoshachaye nřetšá y cabá chě ojamnětéměngaca bnětsana uta sbarécua tmojanajutjé. 21 Chě tmojansěnga imojamna mo shachna uaranga boyabásenga, shembásenga y básenga ntjacuntacá.

*Jesús bėjaye juatsbuacá yojtsaye
(Mc 6.45-52; Jn 6.16-21)*

22 Chentšana, Jesús chabe uatsjédayěnga tojanaměndá chě barquěshoye jtamashjna y chě uafjajónaye chenguánoica chabe natsana jashjaj-nana. Chěntscuana Jesús entšanga yojtichamuá. 23 Nřetscanga tojtanichamó orna, Jesús caně tjoye tojántsjua canya jtsemnama, Běngbe Bětsáftaca jencuéntama. Yojaibétata ora, cha canya chentše yojtsemna, 24 y chě barquěshana tsachocana bēnoca yojtsamna. Y chě olěshěnga chě barquěsha yojtsájantšetaye, chě binya chěngbe contra yojtsemna causa. 25 Ya bínyanoyna, Jesús chěngbioye yojobeconá; bėjaye juatsbuacá yojtsaye. 26 Chabe uatsjédayěnga chca cha tmojánině orna, tša imojocochauatjaná y puerte auatjanáněnga tmojanoyó: —¡Caně añeměse entsemna ca!

²⁷ Pero chora Jesús tojanéyana: —¡Añemo šmochtsebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbioye tbojanianyana: — Bëngbe Utabná, ndegombre aca tcojtsemnëse, mandá atše béjaye juatsbuacá ácbioye chayá ca.

²⁹ Y Jesús tbojanianyana: —Mabo ca.

Chora Pedro chë barquëshoicana tojánastjango y tojanontsé béjaye juatsbuacá Jesúsbioye jama.

³⁰ Pero chë binýia tša jabuache yojtsemnama tojáninýe ora, Pedro puerte yojtsauatja y tbojanontsé jtsenatjëmbambana. Chýyeca cha jabuache tojanchembo: —¡Bëngbe Utabná, šmatsbocá ca!

³¹ Y cachora Jesús tbojtanobuácuetëntsiye y tbojanianyana: —¡Tša batšatema ošbuachiyá! ¿Ndáyeca ndoñe bëtscá átsbeñe contsošbuaché ca?

³² Chentšana chë barquëshoye chata tbojtanamáshëngo y cachora chë binýia bonguana yojtsatsmëna. ³³ Y chora, chë barquëshoye imojtsemnënga Jesusbe shecuatšentše tmojanoshamentsé y tmojanianyana: —¡Aca ndegombre Bëngbe Bëtsabe Uaquiná comna ca!

Genesaret ca uabáinoca, Jesús ba šoquënga tojanashná

(Mc 6.53-56)

³⁴ Chë uafjájónaye tmojánenashbuachengo y canýe luare Genesaret ca uabáinoye tmojánashjajna. ³⁵ Chentša entšanga Jesús tmojantëmbá ora, chë luarentša nýetsca entšanga chama tmojántatšëmbona. As

chë entšanga chëngbe šoquënga Jesúsbioye

tmojanënatse. ³⁶ Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciamana. Y nÿetscanga chabe entšayá sibiájua tmojanábojajënga, shnánënga imojtsatoquëdaye.

15

Ndáyeca canÿe entšá Bëngbe Bëtsabe delante ndoñe tšabia nántsemna
(Mc 7.1-23)

¹ Chora básefta fariseunga y judiëngbe ley abuatambayënga, Jerusalenocana tmojánabënga, Jesúsbioye tmojanobeconá y tmojanianyana: ² — ¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënana ca?

³ As Jesús tojanéjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga imnétsama soyënga jtsamama ca? ⁴ Bëngbe Bëtsá mëntšá tojanmandá: “Acbe bëtsëtsata stëtsoye ndoñe catjáquedaye”, y “nda cachabe bëtsëtsatbiama podescas tojóyebuambase, chana jóbanama jtsemnana ca.” ⁵ Pero tšëngaftanga šmondbëtsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; ⁶ y šmondbëtsichamo nÿe ndánaca chca

tojanenese, ya ndoñe ntsemnana chabe taitá o chabe mamá stëtsoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsétsanga imojanamancá. ⁷ ¡Bacna entsanga, ntšamo ndegombre šmojuabnacá ndinýinýayënga! Nye tšabá chë Bëngbe Bëtsabe juabna oyebuambnayá Isaías tšëngaftangbiana tojanoyebuambá, mëntšá tojánayana ora:

⁸ Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nye uayášaca, pero chëngbe ainanentše atšbiana ndocna tšabe juabnëngaca.

⁹ Chënga nye bonamente mondbétsichamo: Bëngbe Bëtsá tša tšabia yomna ca; chënga nye entsangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

¹⁰ Chentšana Jesús entsanga tojánachembo y tojanëyana: —Smochjouena y chacmësertá.

¹¹ Ndayá entsá tojtsesacá, ndoñe quebochátsbema Bëngbe Bëtsabe delante ndoñe tšabia. Inyetšá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

¹² Chora chë uatsjëndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

¹³ As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana

mochántsejashtse. Cachcá echanjama chë nÿe entšangbe buatëmbana soyëngaca. ¹⁴ Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

¹⁵ Chora Pedro, Jesúsbioye tbojanियana: — Ntšamo chë cuento bétsayanama šmabuayená ca.

¹⁶ As Jesús tojanëjua: —¿Tšëngaftángnaca cabá ndoñe cmontsésertana ca? ¹⁷ ¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana? ¹⁸ Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. ¹⁹ Ainanocana jtsóbocanana bacna juabnënga: jenóbama, shema o boyábioye inÿaftaca jaingñama, shembása o boyabásaftaca bacna soye jamama, jatbëbama, jobostérama y inÿabiamana jtsayátsenayama. ²⁰ Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjanganá
Jesúsbeñe yojtsošbuaché
(Mc 7.24-30)*

²¹ Jesús chentšana, Tiro y Sidón luarëngoye tojt-sanoñe. ²² Canÿe shembása Caná luarocá chentše

inoyena; cha Jesúsbioye yojobeconá y mēntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesuf-rina, bacna bayějbe juabna entsebmna causa ca!

²³ Jesús ndocá tbonjanjuá. As chabe uat-sjéndayēnga tmojanobobeconá y tmojanimpadá: —Chē shembása mēyana chaotsatoñe; bēngbe ústonoye yapa entsáyebuache ca.

²⁴ As Jesús tojánayana: —Bēngbe Bētsá atše šonjichmó jtsanýenama nýe chē entsānga, chē mo ótšena oveshēngcá imomnēnga Israeloquēnga, y chē ndoñe judiēngna ndoñe ca.

²⁵ Pero chē shembása tojána, Jesusbe shecuatšentše tojanoshamentšé y tbojaniyana: —¡Utabná! Diosmanda pavor šmotsebema. ¡šmotsajabuache ca!

²⁶ Y Jesús tbojanjuá: —Chē judiēnga mondmēna mo Bēngbe Bētsabe basengcá y atše ácbioye tcho-juajabuache y chēngbioye ndóñesna, nántsemna mo chē básengbe saná chēnga cuaftsēbaquēcá y quešēnga ftsēbuajocá. Chca jamana ndoñe tšabá quenátsmēna ca.

²⁷ As cha tbojanjuá: —Arseñor. Pero chē quešēngnaca chēngbe nduiñēngbe mesēshentsana tmojatquēcjanatemēnga mondbase, chē nduiñēnga tmojtšesá ora. Chcasna, Diosmanda šmotsajabuache ca.

²⁸ Chora Jesús tbojaniyana:

—¡Shembása, Bēngbe Bētsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmēna.

Jesús ba šoquënga tojanashná

²⁹ Jesús chentšana tojëftsanbocna y chë Galilea uafjajónaye tsachoye tojána. Chentšana, canÿe batsjoye tojántsjuu y choca tojanótbema. ³⁰ Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nÿetscanga tojanashná. ³¹ Y chca orna, chë entšanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmäna, chë coshetënga tšabá imojtsatana y chë jtanëngna yojtsëbinÿna; y chama chënga corente ojnánänënga imojtsemna. Chora chënga corente ojnánänënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

Jesús canta uaranga boyabásenga saná tojanacaredadó

(Mc 8.1-10)

³² Chentšana Jesús, chabe uatsjéndayënga tojánachembo y tojanëyana: —Quem entšangbiamu šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuátëcja ca.

³³ As chabe uatsjéndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiamu saná jinÿenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjúá: —Canýsëfta tandëse y básefta beonatémënga ca.

³⁵ Chora Jesús tojanamëndá nýetsca entsanga fshantsiñe chamotbiamama. ³⁶ As chë canýsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjédayënga tojanëjatá. Chentsana nýetsca entsángbioye tmojanacaredadó.

³⁷ Nýetsca entsanga tmojanse jtoshachaye nýetsá. Y chentsana cabá canýsëfta bëts sbarëcua tmojanajutjé chë tojanójamëtemëngaca.

³⁸ Chë tmojansënga imojamna canta uaranga boyabásenga, shembásenga y básenga ntjacuntacá.

³⁹ Chentsana Jesús, chë entsanga tojtanichamó, barquëshoye tojánamashëngo y Magadán luaroye tojtsanoñe.

16

*Chë fariseunga y saduceunga tmojánbošena
Jesús chaoma canýe bëts soye*

(Mc 8.11-13; Lc 12.54-56)

¹ Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábioyana tainóbocanama.

² Pero Jesús tojanëjúá: “Tšëngaftanga jetiñoye šmondbëtsichamo: ‘Yëfse tšabe te echántsemna, er celoca buánganiñe entsemna ca.’ ³ Y cachëse šmondbëtsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama

šmojtsoobenëse, ¿ndáyeca ndoñe šmontsobena jtsetatsëmbuana ndaye bëts soye Bëngbe Bëtsá quem tempo cmojtsinÿanÿnama? ⁴ Quem puerte bacna entsanga y ndoşbuáchiyënga montseboşe atşe canÿe bëts soye chaima, obenana jinÿanÿiyama; pero ndoñe chca quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soyca ca” —Jesús tojánayana.

Chora Jesús tojésanabashejuana y chentşana tojt-sanoñe.

*Jesús tojanabuayená chë fariseungbe
buatëmbana soyëngama
(Mc 8.14-21)*

⁵ Chë uafjónaye chengvanoicana chënga tmo-jtanabo ora, chë uatsjëndayënga yojésebnëtjomba tandëse jesocñana. ⁶ Chora Jesús tojanëyana: —Smochtsantjeşna; cuedado şmochtsebmna chë fariseunga y saduceungbe levadurama ca.

⁷ Pero chë uatsjëndayëngna imojtsenatsëtsnaye: —Chca entsichamo, bënga tandëse ndoñe tmonje-socñama ca.

⁸ Jesús chë soye yojtsetátşëmbo; chíyeca mëntşá tojanëyana: —¿Ndáyeca tandëşama şmojtsevenatsëtsná ca? ¡Tşa batsatema oşbuáchiyana şmobomna! ⁹ ¿Cabá ndoñe cmontsësertana y ndoñe şmontsabouínÿna chë shachna tandësentşana shachna uaranga entsanga sënjanëjuatşema y bnëtsana uta sbarëcua şmonjánajutjema? ¹⁰ ¿Y ndoñe şmontsabouínÿna chë canÿsëfta tandësentşana canta uaranga entsanga sënjanëjuatşema y

canÿsëfta sbarëcua šmonjánajutjema? ¹¹ ¿Ndáyeca ndoñe cmontsësertana atše tandëšama ndoñe sëntsóyebuambnama? Cuedado šmochtsebmna fariseunga y saduceungbe levadurama ca —Jesús tojanëyana.

¹² As chora chë uatsjëndayënga tojanësertá, Jesús ndoñe tonjánayana chë tandëšentša levadurama cuedado jtsebmna ca, sinó ndayá chë fariseunga y saduceungbe buatëmbana soyëngama.

*Pedro tojánayana, Jesús chë Cristo bëtsemnama
(Mc 8.27-30; Lc 9.18-21)*

¹³ Jesús, Cesarea de Filipino luaroye tojánashjango ora, chabe uatsjëndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná. ¹⁸ Y mëntšánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye

jtsepochócama. ¹⁹ Atše cbochanjátsetaye obenana, mo llavëfjá, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanayana.

²⁰ Chentšana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

Jesús tojánayana cha ibojamna jóbanana y jtayenana ca

(Mc 8.31–9.1; Lc 9.22-27)

²¹ Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanéyana cha mochjanóba, pero unga tianoye yochtanayena ca. ²² Chora Pedro, Jesúsëftaca tojanoluaré y tojanontsé mëntśá uatsëtsnayana: —¡Atśbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

²³ As Jesús tojanobuértana y Pédrëbioye tbojanayana: —¡Satanás, átśbentšana mojuaná! ¡Aca contseboşe atše canÿe bacna soye chaśócochënguama! Pedro, acbe juabnënga Bëngbe

Bëtsábíocana ndoñe quenatóbocana, sinó nÿe entšángbentšana ca.

²⁴ Chentšana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámnaca. ²⁵ Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nÿetsca tescama yomna tšabe vida echanjopérda. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna. ²⁶ ¿Ndayama entšá buanjóservia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? Ndegombre, canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cánÿabioye bochántatšetaye cachcá ntšamo cada ona tojëftsemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinÿcá ca —Jesús tojánayana.

Jesús inyetśá tojanobinŷná
(Mc 9.2-13; Lc 9.28-36)

¹ Chentšana chnĕnguana tianoye, Jesús tojĕftsanĕbiatše Pedro, Santiago y chabe catšata Juan, y inŷoye tojanĕnatse nŷe chĕnga, canŷe bĕts tjoye. ² Chentše, chĕngbe delante inyetśá cha tojanobinŷná. Chabe jubiá shinŷcá yojtsebuashinŷinŷana, y chabe uichĕtjonĕjuangana mo binŷniŷcá uafjantsĕjuangá yojtsamna. ³ Chca orna, chabe uatsjĕndayĕnga tmojáninŷe Moisés y Elías tbojanobinŷná, Jesúseftaca encuĕntaye.

⁴ Chora Pedro, Jesúsbioye tbojaniyana: “Bĕngbe Utabná, ŷtsa tšabá bĕngbiana cuanmĕna muentše jtsemnana ca! Tcojtsebošĕse, unga tambotĕmĕnga atše chjapórma: cánŷetema acbiana, inŷetema Moisesbiana y inŷetemna Elíasbiana ca.”

⁵ Pedro chca yojtsóyebuambnantscuana, canŷe buashinŷinŷana jantšetĕshe nŷetscanga yojáutsbotse. Y chĕ jantšetĕshoicana canŷe oyebuambnayana tmojanuena mĕntśá: “Mua atšbe bonshana Uaquiŷná endmĕna, atše chabiana sĕntsoyejuá. Cha šmochtseyeunana ca.”

⁶ Y chĕ uatsjĕndayĕnga chca tmojanuena ora, tmojanoshamentśé y jubiaca fshantsóntscoŷe tmojanotsejbéna, puerte auatjanánĕnga. ⁷ Chora Jesús chabe uatsjĕndayĕngbioye tojanobeconá, tojánabojajo y tojanĕyana: “Matĕtsbananga; ndoŷe matauatjĕngana ca.”

⁸ Y tsbanánoye tmojanontjeśé ora, Jesús nŷe canŷa tmojáninŷe, ndocná inŷa más.

9 Chë tjocana imojtsatstsmaye ora, Jesús tojanamëndá: —Bëngbe Bëtsá Entśá tbojanbemá obanënguentsana candëtayenëntscuana, ndocnábeñe chë šmonjinýe soyama šmattsecuéntaye ca.

10 As chë uatsjëndayënga Jesús tmojantjá: —¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

11 Chora Jesús tojanějua: —Ndegombre canýa Eliascá natsana echanjabo y ntšamo jtsemnama yomncá, lempe echánjabatsma ca. ¹² Pero atše cbëyana, canýa mo Eliascá ya tonjabo, entsanga ndoñe chematanotëmbá y cháftaca entsanga tmonjanma lempe ntšamo tmojanbošencá. Y cachcá, chë Bëngbe Bëtsá Entśá tbojanbemá entsangbe cucuatšíne echanjasúfria ca —Jesús tojánayana.

13 Chora chë uatsjëndayënga tojanësertá, Juan chë Ubayanabiama Jesús chca yojsëtsëtsnama.

*Jesús, canýe bacna bayëja tbojanbojuaná
(Mc 9.14-29; Lc 9.37-43)*

14 Entsanga imojtsemnoye chënga tmojtanashajna ora, canýe boyabása tojanobeconá, Jesusbe natsanoica yojoshamentsiye y tbojaniyana: ¹⁵ —Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inýe ora iñoye jtseshajayana y inýe orna, buyeshoye jtsošbuetšana. ¹⁶ Acbe uatsjëndayëngbioye cha sënjuánatse y ndoñe chematobená jtseboshnama ca —cha tbojaniyana.

17 As Jesús tojánayana: —¡Njětšá ndošbuáchiyënga y bacna entšanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

18 Chora Jesús, chë basetémbeñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojsatsmëna.

19 Chentšana, chë uatsjëndayënga luaroca Jesúseftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomnëse, masque nÿe mo canÿe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. ²¹ Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemnëse ca —Jesús tojanéyana.

Jesús cachiñe tojánayana cha ibojamna jóbanana y jtayenana ca

(Mc 9.30-32; Lc 9.43-45)

22 Jesús y chabe uatsjëndayënga cánÿiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entšangbe cucuatšiñe mochanjáboshjona, ²³ mochanjóba, pero

unga tianoye echántayena ca.” Chë causa chë uatsjéndayënga puerte ngménaca imojtsemna.

Chë Bëngbe Bëtsabe bëts yebnama impuesto jtsat-squëcjnyama

²⁴ Jesús y chabe uatsjéndayënga Capernaumoye tmojánashjajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquëcjnye ca?

²⁵ Y Pedro tojanëjua: —Aíñe, cha endbetsat-squëcjnye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaboye? ¿Quem luarentša reyënga ndëmuanÿengbioye impuesto inmëtsayëngacaye y crocénana inmëtsatjanaye: cach luarentše oyenëngbioye o chë inÿe luarocana ashjajnëngbioye ca?

²⁶ As Pedro tbojanjuá: —Chë inÿe luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyana ca. ²⁷ Pero ndocná mal chabonduínÿnanamna uafjónayoye motsa, anzuelëffjua cochjútsena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiama y acbiama jëtsjájuama. Cochjëftsejatsëca y cochjatsboshjona ca —Jesús tbojaniyana.

18

¿Nda chë más uamaná yomna?

(Mc 9.33-37; Lc 9.46-48)

¹ Chentsana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canye basetémbioye tbojanchembo y chëngbe tsëntsaca tbojanatsá. ³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjójyëngacñe, cha ndocna te queochatobenaye Bëngbe Bëtsabe amëndayoye jamashënguama. ⁴ Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. ⁵ Y nda átsbeñe ošbuachiyá bëtsemnayeca, tbojofja canya mo quem basetembioycá, chana atše jofjana ca —Jesús tojánayana.

Resjo yomna, nderado bacna soyënga cuanjama

(Mc 9.42-48; Lc 17.1-2)

⁶ “Nda canye básetema átsbeñe ošbuachiyábioye tbojaingñé bacna soye jamama, chabiamá más tšabá nántsemna canye bëts nantsnëbé chamot-setamosëntšbua y chë mar bëjaye shbuatsëntsoye chamotsashbuetše chabotsenatjëmbama. ⁷ ¡Tša lastema quem luarentša entsangbiamá, chë inyënga bacna soye jamama chaócochënguama tmojtsamëngbiamá! Nýets tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënöye cochtsëtšena. Acbiamá más tšabá nántsemna celoye jamashënguana chë nýetsca tescama yomna tšabe vida jtsebomnama, cucuatše ndbomná o cosheto, y ndoñe nýets uta cucuátšeca o shecuátšeca chë nýets tempo echanjesomñe íñeshoye chacmotsëstjango. ⁹ Nderado acbe bomínýeca bacna soye tcojinýe y cachca soye tcojama, chë bomínýe cochtsenobuchjatsëca y bënöye cochtsëtšena. Acbiamá más tšabá nántsemna, celoye jamashënguana nýe canýe bomínýeca, y ndoñe nýets uta bomínýeca infiernoye chacmotsëstjango, chë bëts íñeshoye ca” —Jesús tojánayana.

Chë ótšena oveshabiamá cuento
(Lc 15.3-7)

¹⁰ Mëntšánaca Jesús tojánayana: “Ni mo cánýabioye quem tsëm ošbuáchiyënguentsana, chë mo basetemëngcá mondmënënga, mo nduamanacá šmattsonýaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca. ¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

¹² “¿Ntšamo tšëngaftanga šmatjájuaboye? Canýe boyabása patse oveshënga tojtsabamna y ndeolpe canýe chentša oveshá tojtsotše. ¿Chë boyabása ndoñe chë inýe esconëfta bnëtsana y esconëfta oveshënga tjoca cachcá nanjesënyaye, jama chë ótšena oveshá jetsenguanguama? ¹³ Y chë oveshá jetsinýenama tojobenase, ndegombre chë

boyabása más oyejuayá jtsemnana chë ótsena oveshabiana, y ndoñe nÿa chca chë inÿe esconëfta bnëtsana y esconëfta oveshëngbiana chë ndoñe tmonjanotsëngbiana. ¹⁴ Cachcá, tsëngaftangbe Taitá, Bëngbe Bëtsá, chë celoca endmëná, ndoñe quenátsboše ni canÿa quem basenguentšana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntsamo cuanjama inÿa japerdónama
(Lc 17.3)*

¹⁵ “Nderado acbe catšata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsmëna. ¹⁶ Pero ndoñe tcmonjóyeunasna, inÿe útata cochjáchembo chacmotjëmbambama, chca, chata chabouena ntsamo cochjauyanama y chamuayana ndegombre chca yomnama. ¹⁷ Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canÿa Bëngbe Bëtsábioye nduabuatmacá, mo canÿe ndoñe judiyca ca o canÿe bacna entsá mo canÿa Romocama impuesto entsángbioye atjanayacá yomna ca.

¹⁸ “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canÿe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye

aíñe chaotsemna ca, Bëngbe Bëtsá echanjayana
aíñe chca chaotsemna ca.

¹⁹ “Mëntśánaca cběyana: Nderado útata
tšëngaftanguentśana quem luarentše tbojenoyeuná
Bëngbe Bëtsáftaca jencuéntama ndayánaca
jótjañama, Bëngbe Bëtsá chë celoca endmëná
pronto chë soye cmochanjátśataye. ²⁰ Ndayentše
útata o únganga tmojénefjna, átśbeñe ošbuáchiyënga
bétsemnama, chentše atše chëngbe tsëntsaca
chántsemna ca” —Jesús tojánayana.

²¹ As Pedro tojána y Jesúsbioye tbojantjá:
—Bëngbe Utabná, ¿atśbe catśata bacna soye
šojaborlase, bueta soye šojtsemna cha
japerdónana? ¿Canýsëfta soye ca?

²² Y Jesús tbojanjuá: —Ndoñe nýe canýsëfta
soyama quechatatsëtsná, sinó canýsëfta bnëtsana
soye canýsëfta ca.

Ndayá inopása chë japerdónama ndëbošëngaftaca

²³ Mëntśánaca Jesús tojanéyana:
“Cbochanjáuyana ntśamo Bëngbe Bëtsabe
amëndayana yomnana. Endmëna ntśamo
canýe réyefraca tojanopasacá. Cha yojábošena
chabe oservénënga crocénana jtsëtjañana.

²⁴ Jtsëtjañama yojóntśa orna, canýe boyabása
imojuánatse, chë réybioye mallajta crocénana
ibnandebena.

²⁵ Chë oservená tondaye
yonjábomna chë ndebénama jëtsjájuama; asna
chë rey yojamánda cha chamotsiye nýets
tempo nýe ínýabiama chaotsoservénama, chabe
shema y chabe básengnaca, y lempe ntśamo
yojanbomncánaca, y chca chë ndebénama
jtopágama. ²⁶ Chora chë oservená chë reybe

shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ ²⁷ Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

²⁸ “Chë oservenana chentšana yojésebecna y benachiñe inye oservenáftaca ibojenbetše, cach mandadbiama trabajayá. Chë inye oservenana nýe batsatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebianana y mëntšá ibojauyana: ‘¡Ndebénana šmatsëntšabuaché ca!’ ²⁹ Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ ³⁰ Pero chë oservená ndoñe yonjábošena, sinó yojama chë inye oservenábioye cárceloye chamotsëtámiamana, chë ndebénana candëtsjájëntscuana. ³¹ Chë inye oservénënga chca imojinýe ora, puerte yojóngmia y imojá lempe ntšamo yojopasacá chëngbe rey jacuéntama. ³² As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nýets ndebénana tcbontseperdoná. ³³ Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ ³⁴ Y tša chë rey ibojtsetna; as yojamánda jabuache chamotsetsetšená nýets ndebénana candëtsjájauantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, ce-locá endmëná, cachcá tšëngaftangaftaca echan-jama, tšëngaftangbe catšata ndoñe ndegombre

nÿets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtsenama

(Mc 10.1-12; Lc 16.18)

¹ Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica. ² Ba entsanga tmojanasto y chentše šoquënga tojanashná.

³ Básefta fariseunga Jesúsbioye tmojanobeconá y jisháchichiyama mëntsá tmojantjá: — ¿Queojtselesenciana canÿe boyá nÿe ndayámnaca chabe shémbioye cachcá jesonÿayama ca?

⁴ As Jesús tojanëjua: —¿Tšëngaftanga ndoñe chë Bëngbe Bëtsabe uabemana palabrënguiñe šmëndualía, Bëngbe Bëtsá, chë entsanga tojanabiamá, quem luare jobojátšama ora “boyá y shema tojánabiamama”? ⁵ Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canÿacá bochántsemna ca.” ⁶ Y chca, ya ndoñe útata quebochátsmëna, sinó mo nÿe canÿacá. Chcasna, entsá ndoñe chaondënbema ndayá Bëngbe Bëtsá mo canÿiñcá tojëftsema soye ca —Jesús tojánayana.

⁷ Chora chë fariseunga tmojanियana: —¿As, ndáyeca Moisés tojanmandá, chë shémbioye canÿe uabemana tsbuanácha juiiyana jtsenëtsenama y cachcá jesonÿayana ca?

⁸ Y Jesús tojanëyana: —Tšëngaftanga Bëngbe Bëtsabe mandënga jóyëngacñama ndoñe

quešmátsboše causa, Moisés tmojanalesenciá shémbioye jesétšenana. Pero quem luare jobojátšama orna, ndoñe chca quenjatsmëna. ⁹ Atše cbëyana, nda chabe shémaftaca tbojtsenëtšena y chca tojopasá ndoñe chë shema chabe boyábioye ínÿaftaca tbontseingñé causa, y chë boyá ínÿaftaca tojtóbouamasna, cha chë natsana shémbioye ínÿaftaca jtseíngñayana ca — Jesús tojánayana.

¹⁰ Chora chabe uatsjéndayënga tmojanianana: — Chca chë boyá y shémaftaca tojtsemnësna, ndoñe tšabá yontsemna jobouamayana ca.

¹¹ Y Jesús tojanëyana: —Nÿetscanga ndoñe quemátobena chë palabrënga jójëngacñana, nÿe chë Bëngbe Bëtsá tojama jójëngacñama chamobenama, chëngna aíñe. ¹² Ba soyënga comna ndaye causa chë boyabásenga ndoñe ntsoobenana jobouamayana. Inÿenga jónÿnana jobouamayama ndobenënga, ínÿengbioye cach entšanga jábiamana jobouamayama ndobenënga y ínÿengna, nÿets tempo nÿe Bëngbe Bëtsabe amëndayama oservenana causa ca —tojanëyana.

Jesús, basetémëngbiana Bëngbe Bëtsábioye tbojan-impadá

(Mc 10.13-16; Lc 18.15-17)

¹³ Entšanga basetémënga Jesúsbioye tmojanënatse, cha chauabojajuama y Bëngbe Bëtsábioye chëngbiana chaboimpadama. Pero chë uatsjéndayëngna tmojanontsé chë basetémënga unachayënga jtsécácanana. ¹⁴ Chora Jesús tojanëyana: “Cachcá mónÿyaye chë basetémënga átšbioye chamuabo y ndoñe matëuyanana; er

Bëngbe Bëtsabe amëndayana endmëna mo quem basetemëngcá imomnëngbiana ca.” ¹⁵ As chë basetëmënga tojánabojajo, Bëngbe Bëtsá jaimpádase; y chentšana cha tojtsanoñe.

*Canÿe bomna bobontse Jesúsbioye tojána
(Mc 10.17-31; Lc 18.18-30)*

¹⁶ Chentšana, canÿe boyabása tojána Jesús jinÿama y mëntsá tbojantjá: —Buatëmbayá, ¿ndaye tšabe soye chjama chë nÿetsca tescama yomna tšabe vida jtsebomnama ca?

¹⁷ Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nÿe canÿa endmëna: Bëngbe Bëtsá. Aca chë nÿetsca tescama yomna tšabe vida jtsebomnama tcojtsebošëse, mandënga cochtsobedecena ca.

¹⁸ Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena. ¹⁹ Acbe bëtsëtsata stëtsoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojaniana.

²⁰ Chora chë bobontse tbojanjuá: —Atše lempe chca nÿets tempo sëndocumplina. ¿Ndayá más šojtsebuáshbena ca?

²¹ As Jesús tbojaniana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjémënga cochtsatsataye; chca, bëts uacanana soye celoca cochántsebomna. Chentšana cochjabo y šochjuasto ca.

²² Chë bobontse chca tojanuena ora, ngménaca yojtsatoñe, cha corente bomná bemna causa.

²³ Chora Jesús chabe uatsjéndayënga tojanëyana: —Ndegombre cbëyana, puerta totcá entsemna canÿe bomnabiamá Bëngbe Bëtsabe amëndayoye jamashënguama ca. ²⁴ Chë bomnabiamá cachiñe šcuatayana: Más paselo entsemna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

²⁵ Chabe uatsjéndayënga chca tmojanuena ora, puerta ojanánënga imojtsemna y imojtsichamo: —As, ¿nda yochjobenaye atsbočaná jtsemnama ca?

²⁶ Jesús chënga tojanënyanÿé y tojanëyana: —Entšanga ndoñe quemátobena jamama canÿa atsbočaná chaotsemnama, pero Bëngbe Bëtsá añe, er cha nÿetsca soyënga jamama endobena ca.

²⁷ Chora Pedro tbojaniyana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjóyëngacñe ca?

²⁸ As Jesús tojanëyana: —Ndegombre cbëyana, nÿetsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinÿinÿana bëts tšenëšiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentsa entšangbiama jayanama tšabá o ndoñe tšabá tmonjamama. ²⁹ Y ndëmuanÿenga, atše jaserviama

tmojëftsebohona cachëngbe yebna, catsátanga o uabénanga, befta o bebmá, básenga o fshantsënga, chë soyëngama patse soye más mochanjójyëngacñe y chë nÿetsca tescama yomna tšabe vídnaca. ³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnënga, uámanënga mochántsemna ca —Jesús tojánayana.

20

Chë trabájayëngbiama cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canÿe bëts jajañe nduiñcá. Chë nduiña canÿe te cabá cachëse yojábocna peonga janguanguama, chabe uvas betiyënga jajañe chamotrabajama. ² Chë nduiño peonga yojánÿena orna, imojenóyeunaye canÿe tescama canÿe denario crocénana jtëbuénayama. As chora yojichamuá chë uvas betiyënga jajoye jatrabajama. ³ Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá. ⁴ As yojáyana: ‘Tšëngaftángnaca atšbe uvas betiyënga jajoye motsajna jatrabajama y ntšamo chašmojamcá cbochtëbuénaye ca.’ Y chë entšanga imojá. ⁵ Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶ Mo la cinco ora, chë nduiño cachiñe yojábocna y chenache ínÿenga yojánÿena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’ ⁷ Y chënga imojojuá: ‘Ndocná bënga chešnataimpadá causa

ca.’ As chë nduiño yojáuyana: ‘Tšëngaftágnaca atšbe uvas betiyënga jajoye motsajna jatrabájama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’

⁹ Y chë mo la cinco ora imojáshjajnënga imojobeconá, y cada ona canye denario crocénana yojtáyentsbuachiye. ¹⁰ Chentsana, chë natsana jatrabájama imojáshjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canye denario crocénana yojtëbuénaye. ¹¹ Chca imojóyëngacñe orna, chënga imojóntša chë nduiñbiama bacá ichámuana, ¹² mëntšá: ‘Quemënga chë ústonoye tmonjáshjajnënga nye canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nýets día jabuache fsënjatrabajá y corente jënyá fsënjauantá ca.’

¹³ “Pero chë nduiño canya chca yojt-sichamuábioye ibojojuá: ‘Sobreno, acbiama ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca? ¹⁴ Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá. ¹⁵ Chca entsemna, er atše sëndobena atšbe crocenánaca nye ndayánaca jamana. ¿O aca envidia cojtsebomna, atše tšabia tsmënama ca?’ ” —cha yojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

Jesús cachiñe tojánayana cha jóbanama y jtayenama

(Mc 10.32-34; Lc 18.31-34)

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjédayënga y tojanëyana: 18 “Tšëngaftanga šmontsonyá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšične mochanjáboshjona, y chënga mochanjayana jóbanama cha ibojtsemna ca, 19 y chë ndoñe judiëngbe cucuatšične mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye
(Mc 10.35-45)

20 Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše vojoshamentšičye canyë pavorama jaimpádama. 21 As Jesús tbojantjá: —¿Ndayá cojtseboše ca?

Y chë shembása tbojanijana: —Aca reycá cha-cojtsemánda ora, cochjamánda atšbe uaquiñata chabótbema canyá acbe catšbioica y chë inyá acbe uañicuayoica, ácaftaca chabotsemándama ca.

22 Y Jesús tojanějua: —Ntšamo šmontsotjanañama, tsëndata ndoñe

quešnáatstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

²³ Chora Jesús tojanějua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanÿengbiama atšbe Taitá tojaprontacá ca.

²⁴ Chë inÿe bnétsana uatsjéndayënga chca tmojanuena ora, chë uta catšátaftaca tmojanotjayaná. ²⁵ Chora Jesús chë uatsjéndayënga tojánachembo y tojanéyana: —Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nÿa mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inÿe entšanga sempre chamotsayaunanama. ²⁶ Pero tšëngaftangbeñna ndoñe chca chaondëtsemna. Inÿetsá; masna, nda tšëngaftanguentše chë más uamaná jtsemnama tojtsebošá bontsemna chë ínÿënga jtsaservénana. ²⁷ Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe ínÿabiama nÿets tempo oservernacá. ²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿënga jabáserviama. Y mo nda ínÿënga játsebacama cuafjëtšajocá, cha echanjóbana, ba entšanga atsebácanënga chamotsemnama ca —Jesús tojánayana.

*Jesús uta jtanata tojanashná
(Mc 10.46-52; Lc 18.35-43)*

29 Chënga, Jericó bëts pueblentšana tmojánbocana ora, ba entšanga Jesús imojtsëstona.
 30 Uta jtanata benache juachañe ibnatbemana. Jesús chëjana yojtsachnëjuanama chata tbojanuena ora, tbojanontsé uayebuáchana: —¡Utabná, Davídbentšana Entśá, šmotsalastemá ca!

31 Entšanga chë jtanátbioye tmojtsanëcácana iytëca chabotsemnama, pero chatna más ibojtsáyebuache: —¡Utabná, Davídbentšana Entśá, šmotsalastemá ca!

32 As Jesús yojtsaye, chë jtanata tojánachembo y tojanatjá: —¿Ndayá šojtseboše atše tsëndatbiamá chjamama ca?

33 Y chata tbojanjuá: —Utabná, bëndata chabu-atëbínýnama ca.

34 Jesús chatbiamá tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

21

Jesús Jerusalenoye tojánashjango

(Mc 11.1-11; Lc 19.28-40; Jn 12.12-19)

1 Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjëndayata tojanichamó,

2 y mëntśá tojanëyana: “Tsëndatbe natsana entsemna base pueblotémoye motsata. Cachora canýe burrá utsbuaná šochanjínýena y cháftaca canýe burrotema echántsemna. Sochjuajafjoná y šochjuánatse. 3 Nderado nda ndayánaca chacmojáuyanëse, šochjauyana: ‘Bëngbe

Utabná bontsájaboto y chentsana camuentše echanjabáisabashejuana ca.’ ”

⁴ Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

⁵ Jerusalén bëts pueblentše oyenënga mëyana:

“Minjënga, tšëngaftangbe Rey chentše tšëngaftangbioye entsabó,
 ndoñe mo canya cachá bëtsá enobiamnayacá;
 canye búrrbeñe enjaquená;
 canye burrotémiñe, canye uatrabájaye bayabe šešónbeñe ca.”

⁶ Chora chë uatsjëndayata tbojána y tbojanma ntšamo Jesús tojanamëndacá. ⁷ Chë uatsjëndayatna chë burrá y chë burrotema tmojanënatse, entsayëjuangá chátbeñe tbojanájatse y chora Jesús chábeñe tojanenoyayé. ⁸ Bëtská entsanga chëngbe entsayá chë benachëjana imojtsëtétsatsana, y ínjëngna betiyeshënguiñe buacuafjënga imojtsetcoye y chiñe imojtsequëcñá. ⁹ Y chë natsana imojtsajnënga y chë ústonoyënga mëntšá imojtsaiuáyebuache: “¡Rey Davidbentsana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

¹⁰ Jesús Jerusalenoye tojánamashëngo ora, nÿetsca entsanga imojtsenbouenana y banga imojtsenotíciaye: —¿Nda mua yojtsemna ca?

¹¹ Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentsana enënga y obuámnyënga tojtanëbuacna

(Mc 11.15-19; Lc 19.45-48; Jn 2.13-22)

¹² Chentsana Jesús, Bëngbe Bëtsabe bëts yebnoye tojánamashëngo y chë entsanga chentse imojtsena y imojtsobuámnañënga chentsana tojtanëbuacna. Chéntsnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentsama inoserverna. Chëngbe mesëshangá tojtsanenásatajchquëca y chë palomatema enëngbe tšenëšëgnaca. ¹³ Y tojanëyana: “Bëngbe Bëtsabe uabemana palabrénguiñe cha mëntšá tojánayana: ‘Átsbe bëts yebna echantsabaina átseftaca encuéntaye yebna ca’; pero tsëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

¹⁴ Chentsana, Jesús yojtsemnoye Bëngbe Bëtsabe bëts yebnentsë, jtanënga y coshetënga tmojanobeconá, y cha tojanashná. ¹⁵ Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetémënga Bëngbe Bëtsabe bëts yebnentsë imojtsayebuáchama tmojanuena ora, tša tmojanotjáyananga. Chë basetémënga mëntšá imojtsáyebuache: “¡Chë Rey Davídbentsana Entšá matschuanga ca!” ¹⁶ As Jesús tmojaniyana: —¿Ntsamo chë basetémënga montsichamcá quectsuenana ca?

Y Jesús tojanëjua: —Aíñe, sentsuenana. Pero, ¿tsëngaftanga Bëngbe Bëtsabe uabemana palabrénguiñe chë soyama ndoñe šmëndualía? Chiñe mëntšá endayana:

Chë basetémënga y ochóchaye šešonatémëngbe cantëngaca
aca tcojama entšanga chacmotsatschuanama ca.

¹⁷ Chora Jesús chënga tojésanabashejuana y Jerusalenentšana Betania puebloye tojtsanoñe; y chentše chë ibeta tbojánbobinÿna.

Jesús tojánayana canÿe higo betiye ndoñe más chaondëshájona ca

(Mc 11.12-14, 20-26)

¹⁸ Chë te cachëse, Jesús cach bëts puebloye yojtësa ora, tbojánishëntsena. ¹⁹ Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojínÿena. As Jesús chë higo betiyoye tojánayana: “¡Ndocna te más chaondëshájona ca!” Y betesco chë higo betiye tojtsanbuashá.

²⁰ Chë uatsjëndayënga chca tmojáninÿe ora, imojenjaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

²¹ Y Jesús tojanëjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebomna y chabiamá ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betíyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana. ²² Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojotjañcá šmochanjóyëngacñe ca —Jesús tojánayana.

Jesusbe obenana

(Mc 11.27-33; Lc 20.1-8)

23 Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yo-jtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

24 As Jesús mëntšá tojanějua: —Atšnaca canÿe soye sëntsebmna tšëngaftanga jatjayama, y quešmojuase, átšnaca cbochjáuyana ndaye deréchoca atše chca stsama. 25 ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca? —Jesús tojanéyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’ 26 Pero ndoñe quemuátobena jayanana ‘entsanga ca’; muentša entsangbiana bënga montsauatja, er nyetscanga mondëjuabná Juan ndegombre Bëngbe Bëtsabe juabna oyebuambnayá yomna ca.” 27 Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanéyana: —Atše cach ndoñe quebochatéyana ndaye deréchoca chca stsama ca.

Chë uta uaquiñátbiana cuento

28 Chora Jesús entsanga tojanatjá: —¿Ntšamo tšëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas

betiyënga jajoye jatrabájama ca.” ²⁹ Chë uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá. ³⁰ Chentsana chë taitá chë inÿe uaquiñábioye cachcá ibojauyana. As cha ibojojuá: “Arseñor, aínne chanjá ca.” Pero ndoñe yonjá. ³¹ ¿Chë útatentsana ndëmuanÿá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre cbëyana, chë Romocama entšángbioye impuesto atjanayënga y chë bacna vida bomna shembásenga, tšëngaftangbiamá más montseprontana Bëngbe Bëtsabe amëndayoye jamashënguama. ³² Juan chë Ubayaná tonjánabo tšëngaftanga jábuayenama ntšamo jtsiyenana cmamná, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aínne chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinÿese, chë juabnayana ndoñe šmonjatrocá, chábeñe jtsošbuáchiyama ca —cha tojanëyana.

*Chë puerta bacna trabájayëngbiamá cuento
(Mc 12.1-12; Lc 20.9-19)*

³³ Mëntšánaca Jesús tojánayana: “Inÿe cuento šmochjatuenta chašmuatsjínÿama: Canÿe jajañe nduiño uvas betiyënga yojáje y chë shëconana yojajétja. Chë uvasëšangá juantšëtetjamna canÿe base luare yojajutjo y canÿe tsbanana jebna soye

yojapórma chentše jtsaishanÿama. Chentšana, inÿe trabájayēnga chē jajañe yojárrendaye y chana inÿe luaroye yojtsoñe. ³⁴ Chē uvasēsangá juashacama tempo yojobuache orna, chē jajañe nduiño básefta oservénēnga yojichamuá chē arréndayēnga jáuyanama ntsachetšá chē nduiño ibojtsotocánama. ³⁵ Pero chē arréndayēngna chē oservénēnga imojishēche: ínÿengbioyna imojtsajantšetaye, ínÿengbioye imojtsēbaye y chē ínÿengbioyna ndētšbēngaca imojtsatēchénganja. ³⁶ As chē jajañe nduiño chē natsanama más ba oservénēnga yojichamuá. Pero chē arréndayēngna, ntšamo chē natsanēngaftaca imojamcá, cachcá chora imojama.

³⁷ “Cabana, chē jajañe nduiño cachabe uaquiñá ibojíchmua; as mēntšá yojtsejuabnaye: ‘Átsbe uaquiñá cocayé mochanjóyeunaye ca.’ ³⁸ Pero chē arréndayēnga chē uaquiñá imojinÿe orna, imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga y lempe chabe otocana soyēnga bēngbiamama echanjoquéda ca.’ ³⁹ As chē uaquiñá imojishache, chē uvas betiyēnga jajañentsana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chē jajañe nduiño chaojabo ora, ¿ntšamo šmojtsejuabná chē arrendayēngaftaca cha yochjama ca?

⁴¹ Y chēnga tmojanjuá: —Chē puerte bacna arréndayēnga ni mo batšatema ntjalastemaycá echantsēbaye. Chē jajañe ínÿenga echanjárrendaye y chē uvasēsangá juashacama tempo chaojobuache

ora, ntšamo chë nduiño chabojtsotocancá chënga mochantíyiye ca.

⁴² Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnánänënga fsëntsemna ca.

⁴³ Ntšamo chë nduiño chë arrëndayënga chë fshantse echántsabaca y ínÿënga echantsatsataye y chënga chabiamá bëtscá shajuana mochanjatanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿëngbioye mochántatsatsataye. Chënga Bëngbe Bëtsabe soyëngama mochanjouena y chë soyëngama ínÿëngbioye mochanjabuayená, Bëngbe Bëtsabe amëndayoye jamashënguama. ⁴⁴ Ndánaca chë ndëtsbéne chaojotsatsá, chëbé bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojtsëtsëtsnama, tmojanenótatsëmbona chëngbiamá chca yojtsóyebuambnama. ⁴⁶ Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

*Chë casamento fiestama cuento
(Lc 14.15-24)*

1 Chentšana Jesús tojanontsé cachiñe cuenténgaca chénga jabuátambana. Měntśá tojánayana: 2 “Cbochanjáuyana ntšamo Běngbe Bětsabe aměndayana yomnana. Endměna mo ntšamo canye réyefraca tojanopasacá. Chě rey yojamánda canye běts fiesta jamama, chabe uaquiñabe casamentama. 3 Chora chě rey chabe oservéněnga yojichamuá chě ófjaněnga jobiatšama, pero chě ófjaněngna ndoñe imonjouena jama. 4 As chě rey inye oservéněnga yojichamuá y měntśá yojáměndaye: ‘Chě ófjaněnga šmochjáuyana, ya saná stseboprontana ca. Sěnjamandá, atšbe uacněnga y uamna bayěnga minyicáněnga jobáyama y lempe entseprontana; y chamuabo chě casamento fiestama ca.’

5 “Pero chě ófjaněnga ndoñe imonjouena. Canya, cachabe fshantse inabomnoye yojtsoñe; ínyna chabe obuámnayíñe trabajuama yojtsoñe; 6 y ínyněnga, chě reybe oservéněnga imojishěche, jabuache imojtsatsetsenaye y imojtsěbaye. 7 Y chě rey chě soyama yojouena ora, corente ibojtsetna. As chabe soldaděnga yojichamuá chě oservéněnga obánayěnga chamuetsěbáyama y chěngbe běts pueblo jetsángbotjuama. 8 Chora chabe oservéněnga yojáyuyana: ‘Lempe entseprontana chě casamento fiestama, pero chě ófjaněnga ndoñe quenjatěmerezna moye jabama. 9 Motsajna tsashenangoye y nděmuanýěngnaca chašmojánýeněnga, chě casamento fiestama šmochjúbuaja ca.’ 10 As chě oservéněnga tsashenangoye imojábocana y nyětscanga imojánýeněnga imojáchembo, cánýiñe tsabe y

bacna entšanga, y chca, chë tsbocnanoica jútjena yojtsemna entšángaca.

¹¹ “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. ¹² As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infierno ye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ —cha yojayana.”

¹⁴ Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga chocha jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga chocha mochántsemna ca.”

Chë Romoca bëts mandadbiama impuesto jtsat-squëcjnyama

(Mc 12.13-17; Lc 20.20-26)

¹⁵ Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. ¹⁶ Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre

tšabe vida jtsebomnama, ntšamo Běngbe Bětsá yomandacá, y ndoñe jatuenanana nýe ntšamo entsanga tmojatichamcá, er acbiamá tondaye quenatámana nda más uamaná o nduamaná tomnana. ¹⁷ Chcasna, ¿ntšamo catjájuaboye? ¿Tšabá tayojtsemna, César, chě Romoca běts mandadbiamá, běnga impuesto jtsatsquēcjnayana o ndoñe ca?

¹⁸ Jesús yojtsetátšěmbo chěngbe bacna juabněngama; chíyeca tojaněyana: —Bacna entsanga, ntšamo ndegombre šmojuabnacá ndinýinýayěnga. ¿Ndáyeca tšěngaftanga šmojtseboše chě sóyeca atše jisháchichiyama? ¹⁹ Chě šmatsquēcjná crocénana šminýinýé ca.

As canýe crocénana tmojanoyé. ²⁰ Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

²¹ Y chěnga tmojanjuá: —Césarbe jubiá; cha chca enduabaina ca.

As Jesús tojaněyana: —Césarbioye šmohtoyiye cha ibotocana soye; y Běngbe Bětsana cha ibotocana soye ca.

²² Chěnga chca tmojanuena ora, ojnanáněnga imojtsemna. As chěnga cachcá Jesús tmojanonýá y tmojtsatanoñe.

Obaněnga jtayenama Jesús tmojantjá

(Mc 12.18-27; Lc 20.27-40)

²³ Báseftanga judiěngbe aměndayěnga, saduceos ca uabáiněnga, imojanjuabná chě obaněnga ndocna te ntayenana ca. Cach te, chě impuestama Jesús tojanoyebuambá te, básefta saduceunga tmojána y měntšá tmojantjá: ²⁴ —Buatěmbayá,

Moisés tojánayana nderado canye boyá tojóbana básenga ntjéftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiamá básenga jtsabamnana ca. ²⁵ Chcase, canye bëngbentše canyësëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachcá tonjanopasá, chë inye uabentsáftaca cachcá, y cachcá chë inyengaftaca y chë ústonoca uabentsáftacnaca. ²⁷ Y chentšana chë shembásanaca tontsanóbana. ²⁸ Y morna, chë obanënga chamojtayena ora, ¿ndabe chë canyësëfta catsatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

²⁹ As Jesús tojanëjua: —Ntsamo tsëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. ³¹ Y chë obanënga jtayenamna, ¿ndoñe šmëndualía ntsamo cach Bëngbe Bëtsá chabe uabemana palabrënguiñe tojánayanama? Cha tonjánayana: ³² “Atse sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

33 Chë entšanga chca tmojanuena ora, ojnánänënga imojtsemna ntšamo Jesús yojtsabuátambama.

*Chë más bëts uámana mando
(Mc 12.28-34)*

34 Jesús chë saduceúngbioye iytëca tojánabiamama fariseunga tmojántatsëmbona ora, chënga tmojánenefjna, 35 y canya chënguentsá, ley abuatambayá, Jesúsbioye jisháchichiyama tbojantjá: 36 —Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyets espíritoca y nyets juábnaca.” 38 Chë soye endmëna chë más bëts uámana mando y nyetsca mandëngama chë natsanoca entsemna. 39 Y quem inye soye, chë natsana mandcá endenoparecena. Endayana: “Ndëmua entšánaca cochtsebobonshana, ntšamo cach aca cuenobobonshancá ca.” 40 Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniana.

*¿Cristo, ndabe entsábentšana yomna?
(Mc 12.35-37; Lc 20.41-44)*

41 Chë fariseunga cabá cachentše imojtsemnëntscuana, 42 Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuyanabiamama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

43 As Jesús tojanéyana: —¿Ntšamo chca nántsemna, cach David, chë Uámána Espíritbe mándoca, Crístbioye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crístbioye tbojaniyana:
atšbe catšbioica mótbema,
atšbe obenánaca acbe uayayënga acbe cucuatšinë chamoquedama chjamëntscuana ca.

45 ¿Ntšámose Cristo, Davídbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

46 Chora ndocná tonjanobená ni mo canÿe palabra jojuana. Y chë tescana ndocná yonjenñëmua Jesús más jatstjanayama.

23

Jesús chë fariseungbiana y ley abuátambayëngbiana tojánayana, chënga ndoñe tsabá montsamá ca

(Mc 12.38-40; Lc 11.37-54; 20.45-47)

¹ Chora Jesús, entšanga y chabe uatsjëndayënga mëntšá tojanéyana: ² “Chë fariseunga y chë ley abuátambayënga cmondbétsabuatambaye ntšamo Moisesbe leyënguiñe iuayancá. ³ Chcasna, tšëngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. ⁴ Mo canÿe entšá, couáybioye uauta uasmanësha juasmayana y cachá tondaye tontsasmancá, chënga entšanga jtsamëndayana bëtscá

mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵ Chënga lempe jtsamana nÿe entsanga chamotsënyama. Chënga chë ínÿengbiama más Bëngbe Bëtsá imobobonshana ca chamotsejuabnama, chënga monduamana tëntsa sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšinë chëjënga jenábatsëcana y sibiajana nÿa tëntsa uasebtotonanëjuangá jtsichëtjonana. ⁶ Chënga jtsebošana chë fiestënguiñe nÿa quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entsanga nÿa respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

⁸ “Pero tšëngaftangna ndoñe šmattseboše entsanga ‘abuátambayënga ca’ chacmotsachembuanama, er nÿetsca tšëngaftanga mo catsatangcá šmondmëna, Bëngbe Bëtsabeñe betsošbuachéyeca, y nÿe canÿa endmëna tšëngaftangbe Buatëmbayá. ⁹ Tšëngaftanga ‘taitá ca’ chë ley abuátambayënga šmondbëtsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nÿe canÿe Taitá šmondbomna, chë celoca endmëná. ¹⁰ Ndoñe šmattseboše entsanga ‘mándayënga ca’ chacmotsachembuanama; er nÿe canÿe Mandayá endmëna y cha Cristo endmëna. ¹¹ Nda tšëngaftangbeñe chë más uamaná tojtsemná bontsemna chë ínÿenga jtsaservénana. ¹² Nda cachá bëtsá tojtšenobiamná, nduamaná

mochántsebema; y nda cachá nduamaná tojtsenobiamnana, más bêtsá mochanjábema.

13 “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga šmontsama entšangbiana puerte totcá chaotsemna Bëngbe Bëtsabe amëndayoye jamashënguama, mo bësása cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. 14 ¡Tša lastema tšëngaftangbiana, ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga chë viudángbioye chë tmobomna soyënga jtsabacayana, y entšangbe delante tšabá chacmotsënyama y chënga šmojtsaíngñayama ndoñe chamondëtsetatšëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínÿengbiana cmochanjácastigaye.

15 “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga ba luarënguenache jtsajnana canÿa tšëngaftangbe ustoná onguayiñe, y šmojinÿena ora, tšëngaftanga jamana cha chaotsemna tšëngaftangbiana uta soye más merecido buajoná infernoye chaotsama.

16 “¡Tša lastema tšëngaftangbiana; tšëngaftanga šmondmëna mo jtanënga entšanga unachayëngcá! Tšëngaftanga šmondbëtsichamo: ‘Nda ínÿabioye

tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’ ¹⁷ ¡Obëjémënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiamama josérviamama jtsemnana, nÿe Bëngbe Bëtsabe bëts yebnocca chë castellano tojtsemnayeca. ¹⁸ Tšëngaftanga mëntšánaca šmondbétsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiamama altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’ ¹⁹ ¡Nduabínÿnënga! ¿Ndayá más uámana soye yomna, chë Bëngbe Bëtsabiamama tmojacjá soyënga o chë altar? Chë tmojacjá soyënga Bëngbe Bëtsabiamama josérviamama jtsemnana, nÿe chë altaroca chë soyënga tmojacjáyeca. ²⁰ Nda chë altarama tojajurá, ndoñe nÿe chë altarama ntsejúrayana. Lempe chë altar juatsboca tojtsemnámna cha jtsejúrayana. ²¹ Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúrayana. Bëngbe Bëtsabiamama cha jtsejúrayana, cha chë chentše oyená. ²² Y nda celocama tojajurá, chentše reycá Bëngbe Bëtsabe tbemaniñama cha jtsejúrayana y cachora Bëngbe Bëtsabiámna, chentše yotbemanabiamama.

23 “¡Tša lastema tšëngaftangbiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiama jtsequëcnayana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanángnaca. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entšanga cachca derechënga chamotsebomnama, ínÿënga jtsalastemánana y chë tšabe soyënguiñe jtsiyenana, chca, entšanga tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá. 24 ¡Jtanënga entšanga unachayënga! Tšëngaftanga chë base soyënga jamama puerte jtsenócochinÿenana, pero jtsebnëjtombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entšá ndayá tojtsabuchetjca bayëfja jtsejuánama, ndoñe ntjasama, jasama ndoñe yondëlesenciana ca chë leyinÿe iuayana causa. Pero šmondmëna mo entšangcá ndëmuanÿënga camellbe mëntšena jasana, y chë leyinÿe endayana chcana jasama ndoñe yondëlesenciana ca.

25 “¡Tša lastema tšëngaftangbiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entšangcá ndëmuanÿënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentsénana entšangbiama

mo tšabengcá jtsinýnama, pero tšëngaftangbe ainanentše jútjena entsemna nýe jtsatbëbanama y nýe bëtscá soyënga jésebomnama juabnëngaca. ²⁶ ¡Nduabinýna fariseo! Cochjshetsajbaná ainaniñe bacna soyënga bomnana. Chamna nýe tšabe juabnënga chentše cochtsebomna, y lempe ntšamo chacojtsamcá y entšanga chamojtsonyácá tšabá echántsemna.

²⁷ “¡Tša lastema tšëngaftangbiama, bacna entšanga ntšamo ndegombre šmojuabnacá ndinýinýnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerta botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tšëngaftanga chca šmondmëna: entšangbe delante tšëngaftanga jtsinýnana mo nýetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinýinýnayëngcá y chë bacna soye amëngcá šmontsejuabná.

²⁹ “¡Tša lastema tšëngaftangbiama, bacna entšanga ntšamo ndegombre šmojuabnacá ndinýinýnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nýetsca soyënguiñe tšabá amëngaftaca, chë chëngbiama jtenójuaboyama pormániñe jtsatsbótamnayëse; ³⁰ y chentšana šmondbëtsichamo: ‘Bënga chë bëngbe

bëtsëjémengbe tempo maftsjanienëse, chëngbioye ndoñe matmënjanejabuache chë Bëngbe Bëtsabe juabna oyebuambnayënga jobáyama ca.' Pero mo chëngcá canye buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentšana šmomnama. Y mora cach tšëngaftangbe bëts taitangcá tšëngaftanga šmontsama. ³² ¡Mopochocanga jamama chë bacna soyënga, chë tšëngaftangbe bëts taitanga tmojanbojatšë jamama soyënga!

³³ “¡Mëtšcuayënga, mëtšcuaye entšanga! ¿Ndayá šmochjama chë infiernoca uabouana castigüentšana jótsbocama? ³⁴ Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcamena. ³⁵ Chíyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. ³⁶ Ndegombre cbëyana, lempe chë soyëngama castigo morsca

entsangbiama echántsemna ca” —Jesús tojánayana.

*Jesús tojanošachna Jerusalemoca entsangbiama
(Lc 13.34-35)*

³⁷ Měntsánaca Jesús tojánayana: “¡Jerusalenentša entsanga, Jerusalementša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchénganjana jtsëbáyama. Bueta soye atše sënjábošena tšëngaftanga átsbioye júbuajana, mo canye tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. ³⁸ Y šmochjinýe, atše mora cachcá cbochanjesénýaye, y chca, atšna enánanga cbochanjésabashejuana, mo canye yebna cachcá tcojesonýá y énañe tcojeseboshjoncá. ³⁹ Y atše cbéyana, ndegombre tšëngaftanga morscana atše ndoñe más quešmochátinýe; y atše šmochántinýe mēntsá chašmojtsichamo ora: ‘¡Corente bendición bomná, Bëngbe Útabnabe obenánaca tojabá ca!’ ”

24

*Jesús tojánayana chë Bëngbe Bëtsabe bëts yebna
lempe mochjánpochocama
(Mc 13.1-2; Lc 21.5-6)*

¹ Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjéndayënga chábioye tmojanobeconá y tmojanontsé nyetsca chentša bëts yebnënga cha jinýinýiyana. ² Chora Jesús tojanéyana: “Tšëngaftanga lempe šmontsonýá. Ndegombre šcuayana, quem Bëngbe Bëtsabe bëts yebnentše

ndoñe queochaisoquéda ni mo canye ndëtsbé inye ndëtsbé juatsboye. Lempe mochantsepochoća ca.”

Ntsamo yochtsemna quem luare jopochócama tempo chaojtsobeco ora

(Mc 13.3-23; Lc 21.7-24; 17.22-24)

³ Chentšana chënga Olivos tjashoye tmojána. Jesús choca yojtsetbemana; as, chë uatsjëndayënga tmojanobobeconá nye chëngbiamama jatjayama, mëntsá: —Sméyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinyanÿiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjuá: —Cuedado šmochtsebmna ndocná chacmondáingñema. ⁵ Banga mochanjabo y mochantsabíchamo chënga atse imomna ca. Mochántsicamo: “Atse chë Cristo sëndmëna ca” y chca, ba entšángbioye mochanjáingñaye.

⁶ Tšëngaftanga šmochanjouena canye luarentša entšanga inye luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochásmëna. ⁷ Canye luarentša entšanga inye luaroca entšángaftaca mochántsecsjanaye, y canye amëndayábentša entšanga inye amëndayábioca entšangaftácnaca; y ba luarënguñe shëntsana echanjóshjango y chentša fshantsënga echanjuangmëmëmana. ⁸ Masque chca jasúfriase, más chcoye cabá más mochanjatssúfria.

9 “Chora, entsanga ínÿengbe cucuatshiñe cmochanjábashejuana chacmatsetšenama y cmochantsébaye; y atšbe ústonenga bétsemnayeca nÿetsca luarénguentša entsanga cmochantsébuayënja. 10 Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama ínÿengbe cucuatshiñe mochántsenboshjuana. 11 Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye. 12 Nÿetśá bacna juabnënga entsangbe ainaniñe echanjésemna, y chë causa banga ndoñe quemochátenbobonshana. 13 Pero nda nÿets tempo átšbeñe ošbuachiyá totsomñe, atsbocaná echántsemna. 14 Y quem tšabe noticiënga Bëngbe Bëtsabe amëndayama nÿets quem luariñe entsángbioye mochántسابuayiynaye, chca, chë ndegombre soyënga Bëngbe Bëtsabiamama chënga chamotsetatšëmbuama. Chentšana cocayé quem luare jopochócama tempo echántsemna.

15 “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; 16 entsanga Judeoca chamojtsemnënga, batsjabengoye chamotsacheta. 17 Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftśábocnama.

18 Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama.
 19 ¡Tša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama! 20 Bëngbe Bëtsá šmochtseimpadana chë tšëngaftanga jachetama, uaftena tempo ora o canye ochnayté ndoñe chaondëtsemnama. 21 Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana. 22 Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minÿënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. 24 Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca. 25 Atše ya chama tcbonjabuayená chë tempo cabá ndóshjango ora. 26 Chiyeca, nderado chënga chacmojáuyana: ‘Minÿënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canye tsoca

entsemna ca', chama ndoñe šmattsayaunana.
²⁷ Er ntšamo chë tojatcuinýe ora, shinýe bocanoicana y shinýe uenatjëmbambanëntscoñe jabuashinýinýenancá y ba luarënguenache entšanga jobenayana jinýama, cachcá, Bëngbe Bëtsá Entšá tbojanbemá quem luaroye chaojésabo te, entšanga nyets luarentše mochanjobenaye cha jinýama. ²⁸ Canýe obanabe cuerpo tojtsemnama chë gallinacënga tmojátatsëmbona y cachora chë béconana jojotana. Cachcá, chë castigo echántsemna nýa chama chë tempo chaojtsemna ora ca" —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mc 13.24-37; Lc 21.25-33; 17.26-30, 34-36)

²⁹ Mëntsánaca Jesús tojánayana: "Chë puerte ngménana tempo chaojochnëngüentsana, shinýe ndoñe queochátsbuashinýinýana, juashcona ndoñe queochátsbinýnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana.
³⁰ Chora canýe soye celoca echanjónýna entšanga jinýanýiyama Bëngbe Bëtsá Entšá tbojanbemá ya iuaisaboma, y nyets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinýe celoca jantšetëshiñe echántsaboye, puerte obenánaca y corente buashinýinýaniñe. ³¹ Y canýe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nyets luarëngocana,

celoca cánÿoica juachoicana y chë ínÿoica juachóntscoñe.

³² “Ntšamo higo betíyeca endbétso pasanama šmochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatsëmbuana. ³³ Cachcá, lempe chë ndayama tšëngaftanga tčbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. ³⁴ Ndegombre cbëyana, lempe chca echanjochnëngo, morsca entšanga cabá ndóbana ora. ³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotémënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³⁷ “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entšanga imnasaye, imnofšëšnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana. ³⁹ Chënga tondaye imonjántatsëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entšanga chama mochanjátatsëmbona. ⁴⁰ Chora uta boyabásata

jajoca bochántsemna; canya mochanjesbetše y chë ínÿana ndoñe. ⁴¹ Uta shembásata bochántsejanÿcoye; canya mochanjesbetše y chë ínÿana ndoñe.

⁴² “Chíyeca cuedado šmochtsebmoma y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. ⁴³ Pero quem soye tšabá chacmésertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená
(Lc 12.41-48)*

⁴⁵ “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošjona chë yebnentšënga chaotsanÿenama y jasama tojtsemna ora chaújuatšema. ⁴⁶ Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna. ⁴⁷ Ndegombre cbëyana, chë nduiño chábioye bochanjaimpáda lempe chabe soyënga chabotsinÿeñama. ⁴⁸ Pero chë oservená bacna entšá tomnësna, jajuaboyana chë nduiño ndoñe betseco yochantabo ca, ⁴⁹ y as, cha jóntšana chë inÿe oservénënga jtsajantšetayana, becá jtsesana y jtsetmuana inÿe

tëmiëngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. ⁵¹ Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinÿinÿnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftéšjojnaye ca” —Jesús tojánayana.

25

Chë bnëtsana tobiasëngbiama cuento

¹ Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentše tojanopasacá. Mëntsá yojobása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajëbenguama. ² Chë bnëtsana tobiasënguentsana, shachnënga sempre enójuabnayënga imnamna, y chë inÿe shachnëngna, ndenójuabnayënga. ³ Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. ⁴ Pero chë siempre enójuabnayëngna chëngbe uajuinÿanëshangá imojëftsájaca y querosínënaca botellëšënguiñe imojuabuyamba. ⁵ Chë casamentero boyabásana ndoñe betsko yonjabo, chíyeca nÿetsca tobiasënga ocnayana yojubuache y imojtsomaná. ⁶ Mo tsëntseto orna, chënga imojouena mëntsá uayebuáchana:

‘¡Chë casamentero boyabása ya endabó! ¡Jajébenguama mobocana ca!’ ⁷ Asna, nyetsca tobiasënga imojotsbaná y imojóntša chë uajuinÿanëshangá juabopróntana. ⁸ Chorna, chë shachna ndenójuabnaye tobiasënga chë inÿe shachnënga sempre enójuabnayëngbioye imojáuyana: ‘Diosmanda tsëngaftangbe querosinentšana baseytema šmëbuatšatá, bëngbe uajuinÿanëshangá tojontsé jtsafsanana ca.’ ⁹ Pero chë sempre enójuabnayëngna imojayana: ‘Ndoñe. Tchojubuatšatase, tsëngaftangbiamia y bëngbiámnaca querosine echántasashbe. Más tsábá entsemna, chë querosine mondbétsenoye chašma y tsëngaftangbiamia chašmauábuamiñe ca.’

¹⁰ “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bësása imojtatame. ¹¹ Chentšana chë inÿe tobiasënga imojáshjajna y mëntšá imojtsichamo: ‘¡Taita, Taita, šmebëtafjo ca!’ ¹² Pero chë casamentero boyabása yojójua: ‘Ndegombre cbëyana, tsëngaftanga ndoñe quecbatëbuatma ca.’

¹³ “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tsëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento
(Lc 19.11-27)

14 “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. 15 Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. 16 Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. 17 Chë uta uaranga yojoyëngacñá cachcá yojama y inÿe uta uaranga yojábotiye. 18 Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservénëngbe amëndayá yojtashjango y yojóntša chë crocénánama chënga jatjayana. 20 Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ 21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’ 22 Chentšana chë uta uaranga yojoyëngacñá yojáshjango y chë mandayábioye ibojauyana:

‘Taita, aca uta uaranga šconjanoyé y muentše entsemna inýe uta uaranga sēnjaboté ca.’ ²³ As chē mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bētscá chašcotsinýeñama. Mamáshēngo y átšeftaca cochjóyejuaye ca.’

²⁴ “Pero chē canýe uaranga yojoyēngacñe oservená yojáshjango orna, chabe mandayábioye ibojauyana: ‘Taita, atše sēndétatšēmo aca canýe tšátjaye entšá comnama; acna chē ndoñe tconjajé chentše saná jocñana y chē ndoñe tconjujquēshe luarentše jobuátbanana. ²⁵ Chama atše uatjana šjuábuache, chíyeca atše sēnjá y fshantsiñe chē crocénana sēnjetseitēme. Pero muentše acbe crocénana entsatsmēna ca.’ ²⁶ As chē mandayá ibojuuá: ‘¡Bacna oservená y oyēnjayá! Chē ndayentše ndoñe tijajé chentše saná jocñana y chē ndoñe tijujuquēshe luarentše jobuátbanana atše tsuamanama icojátatšēmbēse, ²⁷ aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyēngacñe y chē chentšana tojoboté crocēnanēnaca ca.’ ²⁸ Y as yojamēnda: ‘Chē uaranga motseboca y chē bnētsana uaranga entsebomnábioye chana motsatšetá ca. ²⁹ Er nda tojtsebomnábioye, más jatšetayana, y chca cha corente bētscá jtsebomnana; pero tondaye tondbomnábioyna, chē batšatema tobomna sóynaca jtsebocana ca.’

³⁰ “Y chora cha yojayana: ‘Quem ndoservena trabajayá shjoca ibetoye matábocna; choca puerta echanjenóbošachna y chē tsetšanama juatsašēnga echantsenoftšojnaye ca.’ ” —Jesús tojanéyana.

Ntšamo chë quem luare jopochócamá ora, nyetsca entsangbiama mochjayana

³¹ Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotémëngaftaca chaojésabo ora, chë reybiama puerte buashinÿinÿana tbemaniñe echanjótbema. ³² Chora nyets luarëngoca entsanga chabe natsanoica mochanjénefna, y cha, entsanguentsana ínÿenga echanjábacacaye, mo chë oveshënga abuañÿya oveshënga chivëngbentsana endbetsabacacnaycá. ³³ Chë abuañÿyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjátsaye.

³⁴ “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiama otocana soycá mosháchiñënga; tšëngaftangbiama endëprontana, Bëngbe Bëtsá quem luare tonjanma orscana. ³⁵ Er atše šonjanishëntsana y tšëngaftanga saná šmonjanaredadó; šonjanajuendá y tšëngaftanga šmonjanafsé; inÿe luarocana ashjanganacá sënjánana y posada šmonjanántšame. ³⁶ Enašá sënjánana y entsayá šmonjanëtsetá jtichëtjuama; šocá sënjanájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

³⁷ “As chë Bëngbe Bëtsá chabe bominÿiñe

tšábenga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjánajuatšé? ¿Ntseco uajuendayá tcbënjáninÿe y tcbënjánafšé? ³⁸ ¿O ntseco inÿe luarocana ashjanganacá tcbënjáninÿe y posada tcbënjánántšame, o enašá y entšayá jtichëtjuama tcbënjánëtšetá? ³⁹ ¿O ntseco šocá o cárceloca utamená tcbënjáninÿe y jauatsëtsayama tifána ca?’

⁴⁰ “As chë Utabná echanjójua: ‘Ndegombre cbëyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

⁴¹ “Chentsana chë Utabná chabe uañicuayoica chamojtsemna entšanga echanjáuyana: ‘Atšbentšana mojuánanga atšbe Bëtsabe uabotënënga. Infierno ye motsajna, chë ndocna te queochátsfsana íñeshoye; choca endëprontana Satanás y chabe ustonëngbiana.

⁴² Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafšé; ⁴³ inÿe luarocana ashjanganacá sënjánana y ndoñe posada chešmatanántšame. Enašá sënjánana y ndoñe entšayá chešmatanëtšetá; šocá sënjanájona y cárceloca sënjanëtámena y ndoñe chešmatanatsëtsá ca.’

⁴⁴ “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjanganacá, o enašá, o šocá o cárceloca utamená y ndoñe tcbënjánajabuache ca?’

⁴⁵ “Y chë Utabná echanjójua: ‘Ndegombre cbëyana, tšëngaftanga ntšamo chë atšbe

catšátanguentsana chë más batsá uámanëngaftaca, ndoñe šmonjanmcá, átseftaca cach ndoñe chešmátanma ca.’

⁴⁶ “Chëngna infernoye nÿetsca tescama mochantsësetjango, y chë Bëngbe Bëtsá chabe bominyiñe tšábenga tojábiamëngna chë nÿetsca tescama yomna tšabe vida mochántsebonna ca” —Jesús tojánayana.

26

Entšanga tmojanjuabó ntšamo jamëse Jesús jishachama

(Mc 14.1-2; Lc 22.1-2; Jn 11.45-53)

¹ Lempe chca tojánayanentsana, Jesús chabe uatsjëndayënga tojanëyana: ² “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ínÿengbe cucuatšiñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

³ Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámána amëndayabe bëts yebnentše.

⁴ Tmojanenojuabó y tmojanenoyeuná jtseingñase Jesús jishachama, yjtsóbama. ⁵ Pero imojtsichamo: “Quem fiestëntscuana ndoñe, entšanga yapa muanjóntša enbouenanana ca.”

Canÿe shembása botamana uanguëtše béjaye Jesusbe bestšašiñe tbojanbuešcja

(Mc 14.3-9; Jn 12.1-8)

⁶ Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. ⁷ Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtše béjajeca. Jesús mesëshentše yojtsemnëntscuana, chë shembása chabe bestšašične chë botamana uanguëtše béjaye tbojanbuešcja.

⁸ Chë uatsjëndayënga chca tmojáninÿe orna, tmojanotjayaná y tmojanontšé ichámuana: —¿Ndáyeca nÿe bonamente chë soye chca yojtsemna ca? ⁹ Chamna, matmënjobenanga chë béjaye becá crocenánama juiyana y chánaca ndbomnjémënga matmënjújabuache ca.

¹⁰ Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. ¹¹ Er chë ndbomnjémëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quicháisemna. ¹² Ntšamo chë shembása tojamcá, chë botamana uanguëtše béjaye atšbe cuerpiñe jabuéšcjëse, cha šontseprónta atše juatbontsa tescama. ¹³ Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámnacá becá mochanjëftsóyebuambaye, chca, entšanga chabiana chamotsenójuabnama ca —Jesús tojanëyana.

Judas tojána bachnangbe amëndayëngbioye, Jesús

*chamuishachama**(Mc 14.10-11; Lc 22.3-6)*

¹⁴ Canÿa chë bnëtsana uta uatsjendayënguentšá, Judas Iscariote ca uabainá, tojána bachnangbe amëndayëngaftaca jencuéntama. ¹⁵ Y tojanatjá: “¿Ntsachetšá šmatjtabuénaye y Jesús tšëngaftangbe cucuatšíne cbochjayentšbashejuana ca?”

As chëngna, unga bnëtsana ralbenga tmojtanabuená. ¹⁶ Y cach orscana Judas yojtsenguaye ntšámose y ntseco ora, Jesús chëngbe cucuatšíne jayentšbáshejuanama.

*Jesús chabe uatsjéndayëngaftaca Bashco saná tojanse**(Mc 14.12-25; Lc 22.7-23; Jn 13.21-30; 1 Co 11.23-26)*

¹⁷ Chë Bashco fiesta bojatšenté, chë levadúraca ndëpormana tandëše jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchauptontama Bashco saná chacosama ca?

¹⁸ Y Jesús tojanéyana: —Chë bëts puebloye mot-sajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echan-jobuache, y atšbe acbe yebnoye sëntšá, Bashco fiesta jamama atšbe uatsjéndayëngaftaca ca.’ ”

¹⁹ As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojan-prontá.

²⁰ Y tojanibétata orna, Jesús chë bnëtsana uta uatsjéndayëngaftaca mesëshentše yojtsemna.

21 Y imojtsesantscuana, Jesús tojanéyana: — Ndegombre cbéyana, canya tšëngaftanguentsá uayayëngbe cucuatšinë šochanjáboshjona ca.

22 Chora chë uatsjédayënga puerte ngménaca imojtsemna y tmojanontsé canyánya Jesús jat-jayama: —Bëngbe Útabná, ¿nderado atše cha chtsemna ca?

23 As Jesús tojanéjua: —Canya nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšinë šochanjáboshjona. 24 Ndegombre, Bëngbe Bëtsá Entzá tbojanbemáftaca echanjopása ntšamo Bëngbe Bëtsabe uabemana palabrënguine chabiamá iuayancá; pero, itša lastema chë bochjáboshjonabiamá! Más tšabá chabiamá manjamna ndoñe ntjónynana ca.

25 As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

26 Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjédayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

27 Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëšasé. Y mëntšá tojánayana: “Nyetscanga quem coptémentšana mofšënga. 28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aiñe yochjochnënguama. Chë buiñe bëtsá

entsangbiana echanjuábuashana, chëngbe bacna soyëngama perdonánënga chamotsemnana. ²⁹ Y ndegombre cbëyana, morscana atše ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentšana, Olivos tjashoye tmojëftsanbocana.

³¹ Choca Jesús tojanëyana: —Tšëngaftanga nyëtscanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguiñe, cha mëntšá tojánayana: “Chë oveshëngbe abujënja chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. ³² Pero obanënguentšana chaitayenentšana, tšëngaftangbe natsana Galileoye chanjá ca —cha tojanëyana.

³³ Chora Pedro tbojanjuá: —Masque nyëtscanga ácbeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

³⁴ As Jesús tbojanianana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe šconduabuatma ca.

³⁵ Pero Pedro tbojanianana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nÿetsca uatsjéndayëngnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá

(Mc 14.32-42; Lc 22.39-46)

³⁶ Chentsana, Jesús chabe uatsjéndayëngaftaca canÿe luare Getsemaní ca uabáinoye tojána. Choca tojanëyana: “Muentše motbiama, chëntscuana atše choye chanjá Bëngbe Bëtsáftaca jencuéntama ca.”

³⁷ Y Pedro y chë Zebedeobe uta uaquiñata tojëftsanëbiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

³⁹ Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondětsemnama. Pero ntšamo atše stsebošcá ndoñe chaondětsemna, sinó ntšamo aca cojtsebošcá ca.”

⁴⁰ Chentsana, Jesús chabe unga uatsjéndayëngbioye tojtanabo y chëngna imnétsomañe. Chca tojánanÿena ora, Pédrëbioye tbojaniyana: “¿Ni mo canÿe horatema tšëngaftanga šmonjobená átšeftaca jtsefšnana ca? ⁴¹ Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

⁴² Uta soyama tojtesaná y mēntšá Bēngbe Bētsáftaca tbojanencuentá: “Atšbe Taitá, atše japadésama ndoñe chašondětsemnama jamama ndoñe jopódianēsna, n̄ye ntšamo aca cojtsebošcá chaotsemna ca.”

⁴³ Y tojtanabo ora, chē uatsjēndayēnga cachiñe imnētsomañe; yapa ocnaye causa n̄ye imojtsefshétana. ⁴⁴ As Jesús cachcá yojētsēñyaye, y ungama cachiñe tojtesaná Bēngbe Bētsáftaca jencuéntama, y cach palabrenga tojánayana.

⁴⁵ Chora chē uatsjēndayēngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tocjobuache, Bēngbe Bētsá Entšá tbojanbemá bacna soye amēngbe cucuatšiñe mochanjáboshjona. ⁴⁶ Motsbananga, cuajna. Minyēnga, chē boshjuaná ya entsebeconá ca.”

Uayayēnga Jesús tmojánishache
(*Mc 14.43-50; Lc 22.47-53; Jn 18.2-11*)

⁴⁷ Jesús cabá yojtsóyebuambnantscuana, Judas, canyē chē bnētsana uta uatsjēndayēnguentšá, tojánashjango, y cháftaca imojtsemna ba entšanga espadējangaca y ngarotbēngaca prontánēnga. Chēnga imojamna chē bachnangbe amēndayēnga y chē judiēngbeñe bētsējemēngcá amēndayēngbe ichmónēnga. ⁴⁸ Judas, chē boshjuaná, tojanjuabó ntšamo jamana entšanga jin̄yan̄iyama ndēmua Jesús bētsemnana. Chíyeca yojáuyana: “Nda chajjauámocho, cha echántsemna. Smochjishache ca.” ⁴⁹ Cachora Judas Jesúsbioye tojanobeconá y tbojanchuá: —Buajtana, Buatēmbayá ca.

Y tbojtanámocho.

⁵⁰ Jesús tbojaniyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

⁵¹ Chca orna, canÿe enutá Jesúseftaca yojtsemná, chabe espadēja tojanenosëngbotëntšena, y chë bachnangbe más uámana amëndayabe oservenábioye canÿe matscuaše tbojtsanëštjango.

⁵² As Jesús tbojaniyana: “Espadēja matosëngbuajonÿá. Nda espadējaca tbojóba chana, cach espadējaca echanjóbana. ⁵³ ¿Aca ndoñe condétatšëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca?

⁵⁴ Pero chcasna, ¿ndayá Bëngbe Bëtsabe uabemana palabrénguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

⁵⁵ Cachora Jesús entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? Atše cada te Bëngbe Bëtsabe bëts yebnocá tšëngaftangaftaca sënjántbemana abuatambaye, y choça ndoñe chešmánishache.

⁵⁶ Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrénguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nÿetsca uatsjëndayënga tmojt-sanëuatjaná y tmojtsanacheta, y Jesús chë uayayëngaftaca cachcá tmojesanonÿá.

Jesús tmojanánatse chë judiëngbe más uámana amëndayëngbioye

(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentşe chë ley abuátambayënga y chë judiëngbeñe bëtsëjemëngcá amëndayënga tmojánenefjna. ⁵⁸ Pedro bënocana Jesús tbojanasto, chë bachnangbe más uámana amëndayabe chashjóntscõe; choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, ⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, ⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajhcana y nÿe unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús nÿe iytëca yojtsemna. Chíyeca chë bachnangbe más uámana amëndayá tbojaniyana: —Bëngbe Bëtsá Ainabe mándoca cbomandá

chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nyets obenana bomnabe catšbioica jtsetbemanana y celoca jantšetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiamana entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjamoto Jesusbe contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.

⁶⁷ Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuébjantšetaye, ⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnaya tcomnëse, ¡momalisiá nda tcmënjajantšetá ca!”

Pedro tojánayana Jesúsbioye ndoñe bonjanabuátma ca

(Mc 14.66-72; Lc 22.55-62; Jn 18.16-18, 25-27)

⁶⁹ Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá

y tbojaniyana: —Acnaca, Jesús chë Galileocáftaca conjánana ca.

⁷⁰ Pero Pédrëna, nyetscangbe delante tojánayana chábioye ndoñe bonjanabuátma ca, mëntsá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bëšoye vojábocna. Chentšna, inye shembása oservená chábioye tbojáninye y chë inye entšanga tojanëyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntsá yojtsejúraye: —¡Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tmojaniyana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canye ngallo yojacánta. ⁷⁵ Y Pedro yojenójuaboye ntšamo Jesús tbojaniyanama. Cha mëntsá tbojaniyana: “Cabá ngallo ndëcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmënaca yojtsenóbošachna.

27

*Jesús, Pilátbioye tmojanánatse
(Mc 15.1; Lc 23.1; Jn 18.28-32)*

¹ Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. ² As, Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnana tojanuena ora, puerta yojtsenócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, ⁴ y mëntšá tojanëyana: —Puerte bacna soye tijama. Atše canÿe bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatsëmbñe ca.

⁵ As Judas chë ralbenga Bëngbe Bëtsabe bëts yebnentše yojesëtsana, y yojá y yojétsentsešaye.

⁶ Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiana soyënga quëcjnayëtémiñe chana jasegórana ca.

⁷ Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canÿe luare jtsebomnana ndayentše chë inÿe luarëngocana entšanga áshjajnënga jutabuantsama. ⁸ Chíyeca, chë fshantse mëntscoñama Buiñe Luare ca

iuabaina. ⁹ Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamananacá, ¹⁰ y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante

(Mc 15.2-5; Lc 23.2-5; Jn 18.33-38)

¹¹ Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjëmënga Jesús mal imojtsequédantscuana, cha ndocá ntjojuana. ¹³ Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴ Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mc 15.6-20; Lc 23.13-25; Jn 18.38–19.16)

¹⁵ Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná. ¹⁶ Chë tempo canye uachuana utamená inamna, Jesús Barrabás ca uabainá. ¹⁷ Njetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše

chjëtsboshjonama, Jesús Barrabás o Jesús, chë Cristo ca monduabobuatmá ca?”

18 Er chë mandado yojtsetátšëmbo, entšangna envidia causa Jesús chabe cucuatšíñe tmojánboshjonama.

19 Pilato chë tribunal ca uabáinentše yojtsetbe-manëntscuana, chabe shema canya tbojanichmó mëntšá cha jauyanama: “Chë nýetsca soyënguñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

20 Pero chë bachnangbe amëndayënga y chë bëtsëjémënga entšanga tmojanayëñaná, Barrabás jëtsboshjonama y Jesús chaóbana ca chamuayanama. 21 Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

22 Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjuá: —¡Motsecrucificá ca!

23 Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: — ¡Motsecrucificá ca!

24 Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá búyeshe juabuíyëboñana y nýetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbana. Tšëngaftanga lempe šmonjama ca.

²⁵ Chora n̄yetsca entsanga tmojanjuá: —¡Quemuá yochjóbanama, bēnga y bēngbe básengbiana castigo chaotsemna ca!

²⁶ As Pilato, Barrabás tbojtanboshjona; tojanmandá soldadēnga Jesús jabuache chamotsetsetšenama y chentšana entsangbe cucuatšiñe tbojánboshjona chamocrucificama.

²⁷ Chentšana, chē mandadbe soldadēnga Jesús tmojanánatse chē mandadbe bēts yebnentša chashjoye y choca n̄yetsca soldadēnga chabe shēconana tmojanójoto. ²⁸ Chorna, entsáyá tmojtsanabotsca y shbuenda uafjatsenga entsáyá mo reycá tmojanichētjo. ²⁹ Can̄ye coronēsha tmojanapormá uchmašēfjangaca y tmojanabestšajó, y catšbioica cucuatšiñe can̄ye niñēfja. Chorna, chabe shecuatšentše imojtsofshēntsaméntšenaye y imojtsáboyejuana. Mēntšá imojtsichamo: “¡Bayté judiēngbe Rey cochtsemna ca!”

³⁰ Chēngnaca imojtsanbuashētjnaye y cach niñēfjaca bestšašentše imojtsētšjanjnaye. ³¹ Y chca imnaftsáboyejuanentšana, chē shbuenda uafjatsenga entsáyá tmojtsanabotsca y cachabe entsáyá tmojtanichētjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

³² Chē entsanga chentšana tmojánbocana ora, tmojánenbetše can̄ye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

³³ Canÿe luare Gólgota ca uabáinoca tmojánashajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye hiéloyeca enájuabniye tmojanabuiyé chaofšema; pero yojaftántia y ndoñe yonjábošena chiye jofšiyama.

³⁵ Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama. ³⁶ Y chora chënga chentše tmojanotbiamama Jesús jtsebojanÿama. ³⁷ Y chabe bestšaše juatsboicna canÿe uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

³⁸ Utata bacna soye ochjajnayátnaca chënga chentše tmojanrucificá, canÿa Jesusbe catšbioica y chë ínÿana chabe uañicuayoica. ³⁹ Y chëjana imojtsachnëjuana entšangna, Jesús imojtsóyenguaye, imojtsobestšfshanenaye ⁴⁰ y imojtsatsaye: “¡Aca chë icobena Bëngbe Bëtsabe bëts yebna jtsenásatajhcana y nÿe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

⁴¹ Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: ⁴² “Cha ínÿenga tojëftsatsebacá, pero cachá jétsbocama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga

chábeñe fchtsošbuáchiye. ⁴³ Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

⁴⁴ Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

⁴⁵ Njëtsto orscana las tresëntscoñe, njëts quem luare yojtseibétata. ⁴⁶ Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

⁴⁷ Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canýa tojëftsánótjajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësëtjo y Jesúsbioye tojanbeconá chaofšema. ⁴⁹ Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnoca yojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana. Fshantse yojuangmëmëna, ndëtsbenga yojtsashtëtšana, ⁵² y chë cuevëshënga

obanəngaca yojtsetəfjo y banga Bəngbe Bətsabe entšanga tmojtanayena. ⁵³ Y chənga, Jesús tojtanayenentšana, chə cuevəshənguentšana tmojánbocana, y Jerusalén, chə uámana bəts pueblo ca uabáinoye tmojánamashjna y ba entšángbioye tmojánəbəbuacana.

⁵⁴ Chə soldadəngbe aməndayá y chə ínɣənga, Jesús jtsebojanɣama cháftaca tmojanoquedanga, chə fshantse yojuangmėmanama tmojáninɣe ora, y nɣetsca chə yojtsechnəjuana soyəngama, puerte auatjanánənga imojtsemna y tmojánayana: “iNde-gombre quem boyabása Bəngbe Bətsabe Uaquińá yomna ca!”

⁵⁵ Ba shembásəngnaca chentše imojtsemna y bənocana imojtserreparana. Chəngna, Galileocana Jesús tmojanasto y cha imojanájabuachana. ⁵⁶ Chə shembásəngbeńe imojtsemna María Magdalena; María, Santiago y Josebe mamá; y Zebedeobe uaquińatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibətātana ora, canɣe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinɣama, Jesusbe cuerpo jotjańama. As Pilato tojanmandá chə cuerpo chamontšabuáchema. ⁵⁹ José chə cuerpo tojanca y canɣe nduatsenga lino entšəjuaca tbojanandmaná. ⁶⁰ Y canɣe chabe tsəm cuevəshińe tbojanajájó. Tempo cha inamánda chə cuevəshna ndətsbenguińe chamopormama. Canɣe bəts ndətsbé tojansjoná y chə cuevəshoye amashjuanentše tojánachto; y chentšana José

yojtsatoñe. ⁶¹ Pero María Magdalena y chë inÿe Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jt-sebojanÿama

⁶² Yëfsana, chë ochnayté, chë bachnangbe amëndayënga y chë fariseunga cánÿiñe tmojána Pilato jinÿama. ⁶³ Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entšanga chamúyana, Jesús tojtayena ca. Y chca, chabiamá quem ústonoye bostero soye, chë cachabiamá tojánayana soyëngama puerte más bacá nántsemna ca —chënga tmojaniana.

⁶⁵ As Pilato tojanëyana: —Tšëngaftanga cach tšëngaftangbiamá soldadënga šmondábamna. Mot-sajna y chë cuevëshe cuedádoca šmochtsashanÿá, ntšamo šmondëtatsëmbcá ca.

⁶⁶ Chora chënga tmojána chë cuevëshe jtsashanÿama; chë ndëtsbena, tsengájašeca imojuinÿnaná, ntsotatsëmbcá ndocná choye chaondámashënguama, y soldadënga chentše tmojëftsanashejuana.

28

Jesús tojtanayena

(Mc 16.1-8; Lc 24.1-12; Jn 20.1-10)

1 Ochnayté chentšana, chë inÿe semana bojatsenté yojtsebínÿana ora, María Magdalena y chë inÿe María tbojána cuevëshoye jarrepárama. 2 Ndeolpe fshantse tojanangmëmmana, er Bëngbe Bëtsabe canÿe ángel celocana tojántsma, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema. 3 Chë ángelna mo canÿe tcuinÿejcá yojtsebuashinÿinÿana, y chabe uichëtjonëjuangá uafjantsëjuangá mo jantšetëshcá yojtsamna. 4 Chë soldadënga chca tmojáninÿe ora, de auatja yojtsangmëmnyaye y mo obanëngcá imojtsemna.

5 Chora chë ángel chë shembásatbioye tojanëyana: “Ndoñe batauatjana. Atše sëntsetatsëmbo tšëngaftanga Jesús, chë tmonjancrucificá cha šmojtsenguama. 6 Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinÿe cha endétsesegoranentše. 7 Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinÿe ca.’ ” Y chora cha tojánayana: “Chca šondmëna tšëngaftanga jauyanana ca.”

8 Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsannotjajo chë soye chë uatsjëndayëngbeñe jobuambayama. 9 Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtanadorata y chabe shecuatše shëconana imojtobojcjuá. 10 Y Jesús tojanëyana: “Ndoñe batauatjana. Motsata atšbe uatsjëndayënga, atšbe catšátanga jáuyanama

Galileoye chamotsá y chocha atše šmochjinÿe ca.”

Ntsamo chë soldadënga tmojánayana ndayá tojanochñënguama

¹¹ Chë shembásata ibojtsayëntscuana, básefta soldadënga chë bëts puebloye tmojána y ntsamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá, ¹³ y mëntsá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjëndayënga tmojabo y chabe cuerpo tmojabétsatbëba ca. ¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” — chënga tmojanëyana.

¹⁵ As chë soldadënga chë crocénana tmojanóyëngacñe y tmojanma ntsamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama (Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canÿe uatsjëndayënga Galileoye tmojána, chë ndëmua tjoye Jesús chënga tojanabuayená choye. ¹⁷ Y Jesús tmojáninÿe ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca. ¹⁸ Jesús chëngbioye

tojanobeconá y tojaněyana: “Běngbe Bětsá nŷets mando atše šonjatšetá celoca y quem luarentše. ¹⁹ Chcasna, motsajna, nŷets luarěnguenache oyeněnga atšbe uatsjěndayěnga šmochjábiamá. Entšanga šmochjubaye atšbe Taitá, atše chabe Uaquiñá y chě Uámana Espíritbe uabaina jayaněse, átšbeñe šmošbuachéyeca, ²⁰ y šmochjabuatambá lempe ntšamo atše tchojaměndacá chěnga chamóyeunama. Y ndegombre atše nŷets tempo tšěngaftangaftaca chanjěftsemna, quem luare jopochócantscuana ca” —Jesús tojaněyana.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clix

PDF generated using Haiola and XeLaTeX on 11 Nov 2022 from source files
dated 29 Jan 2022
19104c0e-9046-5ff3-82fb-eb838c88dcf9